

正陽縣志

表乃寬署

重修正陽縣志目錄

卷首

序

凡例

修志姓名

目錄

圖

縣總圖
巖宮圖

五區分圖
黃公祠圖

城關圖

四大鎮圖

卷一

地理

星野
山脈

疆域沿革
河流

縣治形勢
水利

距離道里
古蹟

疆界道里
古蹟考
治區沿革

建置

城池
工廠

街巷
營防

官署
舊蹟

局所
壇廟附宗祠

學校
寨堡

倉廩

卷二

政治

縣政組織
自治機關

政治沿革
爵職紀

民政
職官表

軍政
政績傳

警政

司法

財務

田賦附附加

公款機關

稅項

捐項

雜項

交通

驛站郵政

電報

道路

橋梁

津渡

水運

實業

農業
牧業

林業
商業

動物鳥獸魚鱉
工業

漁業

蠶業

蜂業

卷三

教育

學宮
學校

學規
典禮

教官
鄉儀

書院
風俗附節序

義學
宗教

教育機關

選舉

徵辟

科貢

議員

學校畢業

大事記

附清鄉局
普濟堂

振務會
育嬰堂

慈善局
養濟院

政黨沿革

卷四

人物

附方技

游寓

卷五

人物

卷六

藝文

經傳

著作書目
集文

卷七

藝文

集文

集詩

卷八

藝文

集詩

金石

卷末

雜綴

軼事

異聞

舊志序

重修正陽縣志卷八

總纂 光山

堯初 陳全三

編纂 邑人

益三 潘守謙
漁村 呂兆璜
少章 吳彬詒
子翔 鄆鵬雲
屏亞 蕭廷藩

校正 邑人

紹宣 趙憲章

藝文志 集詩

春日別小園

邑歲貢 渭川 王夢清

積年澆灌課新莊。忽事輕車向遠鄉。一粒官催入竟去。滿園花笑爾何忙。萍非離水終成泛。絮到沾泥始不狂。物理細推猶若此。田園誰信何嘗荒。

憶小園

王夢清

牡丹微綻藥微葩。滿架木香欲試花。當此遠行應笑我。因何輕擲不憐他。一春濃淡知奚似。經歲工夫用又差。似爾相看能幾度。吁嗟未已又吁嗟。

虞城五日

王夢清

前日成臬逢上巳。今朝虞邑又端陽。斷蓬身世踪難定。殘雪年華去太忙。一樹榴花思往事。半杯蒲酒醉他鄉。故園舊俗兒偏記。茱萸新茱古壁旁。

自歎

王夢清

寂寥全似故時居。無那閒情一擲虛。鬢老寸絲猶不挂。花殘半子竟相如。恨當今日難耽酒。悔却當年錯買書。只有新來堂上燕。時時向我說華胥。

憶菊

王夢清

秋光容易又經年。寂寞疏籬匝晚煙。舊日園亭三逕冷。新來顏色幾家鮮。西風有約期偏阻。明月無情望未圓。瘦盡寒蛩飛盡蝶。霜華如雪不成眠。

訪菊

王夢清

小院疏簾下晚風。秋懷無主倍怱怱。經過門巷心先醉。隔着籬笆話早通。佳種尙思前度試。美人應許此間逢。白雲紅葉家家是。踏遍寒山興不窮。

問菊

王夢清

薄醉林皋倚夕晴。問花不語對花傾。九秋顏色輸誰豔。三逕風煙共孰爭。屈子緣何甘作饌。陶公爲底獨憐卿。瑤臺說有司花者。譜在羣芳第幾名。

供菊

王夢清

風風雨雨近重陽。翦取寒花置草堂。有包爭含三逕露。無言冷抱一枝香。燈烟篆處成清奉。午睡醒餘對淺粧。着個膽瓶添雪水。助他嬌韻幾分長。

采菊

王夢清

后土難埋一瓣香。霜前月下普收藏。蓬心何處謀金屋。傲骨生嫌傍玉堂。食餅安排知我拙。糟邱料理得君強。更聞作枕延年說。聊與從同也不妨。

夢菊

王夢清

翠羽明珠瞥覺休。肯將醒眼白時流。華胥有路生非草。籬落無言色是秋。冷淡光陰憑意到。風霜世界仗神遊。謝公鎖事陶家興。兩處情懷一處收。

別墅初構

馭名翠
芳小治

王夢清

風掀雨打大江波。年擬輕舟歎奈何。滿眼芳華輪已甚。一生邱壑負良多。可能舊卷終親我。無那囂塵少避他。有鳥提壺相勸苦。一聲聲喚聽休訛。

其二

老去惟耽歲月迂。幾間茅屋向幽隅。鴛原舊友歌相應。燕擬新聲夢亦須。可許儂同竹作伴。無妨花喚我爲奴。更兼供給能饒處。酒熟葡萄酒菜煮瓠。

村居

王夢清

老樹重重古屋遮。綠陰深處有人家。隔籬犬吠街頭屐。曲渚魚吹水面花。倦去攤書催午夢。閒來煮鼎試新茶。忽聞牛背笛聲起。滿院晴光落晚霞。

贈吳海槎

王夢清

十年羸馬走京華。雅誼高懷各一家。夙累欠多惟酒債。生涯習慣是梅花。財因友助衣空篋。詩爲僧題壁障紗。底事至今猶未遇。徒令舊雨歎征車。

羣芳小治與顧漢秋同居

王夢清

小築街西地。先生且暫居。所期惟淡泊。止此足紆徐。興至時分韻。閒來一看魚。穿花階下蝶。相對兩蘧蘧。

其二

王夢清

綠映窗前草。紅搖池畔蕖。牆低能引樹。竹小不遮廬。茶鼎煙痕靜。書帷足影疏。苔岑有真樂。何必問盈虛。

山居

王夢清

寂寂門常掩。微微路幾彎。一田屯野水。雜藥長春山。蜂去花鬚定。巢成燕嘴閒。濃陰忘坐久。塵慮不須刪。

冬日卽事

王夢清

小屋藏深院。疏簾障遠風。課兒餘雪白。留友晚爐紅。好夢梅能到。閒吟酒易工。杏花消息早。逐日煖烘烘。

陳家窪

王夢清

遠山涼生夏也秋。吾人一到一番幽。香生隣煮菘秧飯。水淺河停渡客舟。向曉烏催新耳換。多年松與此心謀。青山空抱留人意。浪跡慙對昨宿鷗。

信陽州道中

王夢清

微雨河沙濕。空青客况閒。有田皆聚水。無路不臨山。小熱松棚構。生涯草履艱。平生饒逸興。老去愈難刪。

自西雙河歸陳家窪

王夢清

此去雖云阻。崎嶇不憚行。竹迷當面路。泉響隔年聲。屋盡依山築。田多累石成。豈因爲客慣。邱壑有餘情。

船發息縣

自息邑往廬州府訪顧漢秋

王夢清

大造無羈客。寥空遠翫情。一篙新息水。千里合淝城。久隔隣同住。茲因有舊盟。佇看邱壑像。眼底日紛呈。

發大埠口

王夢清

一夜雨滂沱。紛紛客棹過。水深翻浪急。帆飽受風多。異地饒奇概。前途歎逝波。故人相待久。此意莫蹉跎。

過裴子巖

王夢清

裴子巖前客路賒。木棉種滿老農家。秋風野店無他見。箇箇招牌寫賣花。

晚起

王夢清

已慣農興五十年。噴花掃地課常先。而今變卻當年局。窗自紅生我自眠。

憶家中菊

王夢清

親栽親灌已臨秋。準擬寒香特地幽。最是花開身遠客。未知花亦憶人不。

憶家中梅花

王夢清

戴月鋤來冷不知。一朝相別便相思。況今遠客經千里。訪遍街頭無一枝。

正陽懷古

光山庠生
位三氏 陳育姜

當年叔度棲遲地。此日登臨感慨生。東漢波濤留郭太。大唐碑碣識真卿。芳祠古墓黃
公里。剩水殘山沈子城。清濁緬懷千載上。令人無復鄙心萌。

恨溝懷古

陳育姜

黃塵漠漠草芃芃。往蹟流傳大業中。樓閣昔年瞻帝氣。田疇今日沒王宮。西懷關陝人
何在。東往江河路不通。欲問前朝興廢事。亂鴉無數夕陽紅。

正陽館中作

陳育姜

廿年三度到真陽。悶對東風恨更長。地自淮南分豫楚。人憐燕北感滄桑。一時官吏侵
漁甚。萬里河山逐鹿忙。我是光黃湖海士。又留泥爪汝墳旁。

渡淮河

陳育姜

淮河日夜東流急。兩岸扁舟一葉通。為問行人爭利祿。茫茫誰識禹王功。

夏日聞笛

陳育姜

夕陽西山暮雲收。玉笛聲聲起畫樓。疑是仙人明月夜。梅花吹落大江頭。

閔正陽縣志

陳育姜

襟淮帶汝屬心房。沃壤人稱古愼陽。漢魏之間多廢置。熙雍而後漸繁昌。封圻列國原歸沈。邑乘成書實自張。誰似當年黃與戴。邦家千古有奇光。

詹姐詞

邑拔貢 葛民 葉曾疇

詹姐姓萬氏。汝南埠南農家女。黃滿倉童養婦也。生同年月。年十八滿倉病歿。母欲嫁之。遂自縊死。因爲之詞。

雙蓮出綠波。相望何盈盈。郎呼妾爲姐。妾呼郎爲兄。狂風吹蓮折。一枝成孤處。可憐黃家兒。哭殺萬家女。阿母心悲摧。念女未結縈。奈何守空義。辛苦終何時。重爲結婚姻。大節亦無虧。邀女暫還歸。私爲託良媒。有客從南來。自跨千金駒。人馬相輝映。年可十五餘。阿母指謂女。若人復何如。若人固自好。阿女字人早。甯有孤飛鴻。重作比翼鳥。春蠶吐柔絲。纏綿空自繞。誰使生蛾眉。不絕終不了。強笑謝阿母。日暮還家門。解帶挂屋梁。燈月爲之昏。姐家四旺店。郎家六里莊。合葬汝水頭。化作雙鴛鴦。鴛鴦飛且鳴。去去何

徜徉。生前身相許。身後莫相忘。

慎子將軍墓

葉曾墳

何年留古墓。云是慎將軍。幾處邊聲起。將軍聞不聞。

黃徵君故里

葉曾墳

叔度牛醫兒。家在真陽裏。羣賢初不識。一見推顏子。生當漢末季。累徵終不仕。龍德豈偶然。鴻冥良有以。言辭不概見。文字復誰紀。何物庸妄兒。乃託天祿史。我家與君鄰。生小識君里。每欲詠高風。多言心先恥。新祠長白蘋。古墓留芳芷。何代無遺賢。不遇林宗耳。君看千頃波。寧爲微風起。望古懷昔人。惆悵何能已。

避兵正陽遇吉林歸軍知杭州蘇州相繼失守

葉曾墳

君家絕塞未歸休。我困孤城不盡愁。相對一樽渾似夢。傷心無復說杭州。纔失杭州又蘇州。東南佳麗一時休。西湖烟月吳娘曲。誰復春帆載酒游。

淮陽行

葉曾墳

水旱火盜蝗疫兵。天機欲殺人欲生。兩爭不下何時了。惟有不生不死難爲情。十年一
一歷此境。痛哭不已發歌聲。那知造化變愈慘。我縱言之誰能聽。十里百里無人行。瓦
礫高下骨縱橫。不知爲池爲臺爲亭閣。爲民爲賊爲公卿。昨日歌舞地。今日蒿里塋。黃
蒿索索陰風響。白日淡淡陰燐明。時遇一人使人驚。初疑爲賊繼疑鬼。非賊非鬼向我
痛。乃是舊日老田父。曾佃我田三年耕。一家喪失身不死。衣草倚壁聊藏形。不忍終其
語。驅馬尋歸程。吾家卽此地。溪柳傷心青。燕燕爾何來。翩翩飛且鳴。亦知梁傾巢已毀。
何必徘徊留戀不能征。何當指顧起樓閣。重開草昧披榛荆。不然振翼竟飛去。燕兮燕
兮。此身安得如汝輕。

汝墳有連理

爲馮氏女作
事在寒凍

葉曾楨

汝墳有連理。斧斤不能斯。汝水有浮萍。風波時轉移。連理生土壤。浮萍託水涯。土壤難
動搖。流水有東西。不見馮樂女。少字李來遲。女父從逆死。李氏恥與齊。辭婚告府縣。府
縣皆斷離。阿女聞此語。泥母大悲啼。好女字一氏。好鳥棲一枝。寧作李氏鬼。不作別家

兒阿母重控告。府縣如不知。鐵案難動搖。痛哭訴阿誰。別有街東某。有女及笄時。門戶正相對。容貌兩不疑。千金結婚姻。十月定娶期。阿母聞此語。爲女早冠笄。今日往汝家。有死莫來歸。阿女登車去。珠淚百餘行。朝離母家門。暮到李家堂。登堂拜阿姑。顧步生輝光。婢媼驚豔麗。娣姒稱賢良。來遲塾中歸。進退還徬徨。腩腆相揖拜。館女除東廂。百兩迎某女。某女大搥床。恥後之子歸。不衣新婦妝。阿兄亦大怒。携遲赴公堂。縣官登堂坐。開譬千萬方。何分嫡與庶。同效英與媼。女家無改移。姑家終分張。昔爲牛與女。今爲參與商。錦箋碎鸞鳳。比翼折鴛鴦。官賢馮樂女。贈以女兒箱。妝奩認爲女。送女歸李郎。鼓吹何喧闐。旌旗爭輝煌。繡轡鏘珠玉。羅帳垂香囊。閨里爭歎羨。賢哉新嫁娘。汗泥出茵菑。貴賤復何常。獨有東家女。閉戶淚霑裳。

黃徵君故里

邑舉人吳清俊

字禾生一號章民

慎陽在東漢。菁英洩天地。挺生多賢豪。物望歸純粹。邈矣黃叔度。端居抱德器。一見鄙吝消。豈由聲華致。我讀元亮錄。遺聞采高義。匍匐送李俔。孝廉徵不至。汝南重氣節。范

書略斯事。先生有其全。區區安足誌。外史出崑山。文人聊寄意。當年縱歷聘。雅量肯輕肆。長揖謝膺蕃。不受朋黨累。戴母賢且明。觀兒知感被。想見蹈中和。渾然無瑕類。川原如昨日。化機豈終閉。誰歟繼德音。士風宏鼓吹。躬行不近名。獨立不表異。耕桑導庶氓。禮樂蒸善類。衡門多雨雪。重攬林宗轡。汪汪千頃波。迴盡百川逝。幸居顏子鄉。兼沐荀公治。願言遵禹孔。師表明吾志。

葉太翁遺照

邑廩生葉立初名
蔭昨之先君子

吳清俊

岡頭雲物繞書城。百尺高梧院宇清。前輩典型瞻望在。坐聽雛鳳怡心情。自昔高陽冠蓋里。州符郡鐸紆青紫。伏生老去自傳經。元亮隱居惟教子。有子才名繼弁山。仰承家學力追攀。從來積善流祥處。多在槐庭桂樹間。顧我婀娜間作客。相從朝夕文章伯。爲談畫荻等劬勞。爰示受書留手澤。白鬚青暎意高深。還讀誌銘挹德音。平生自說金剛兒。畫圖寫出菩提心。是日伏庚間夏永。琅玕不動花低影。肅然錦暉啟中堂。四座清風生靜境。乃知道理圓足古醇儒。相對浮情淡欲無。萬石躬修國矜式。河東家法世規模。

後進何能窺雅度。惟將仰止託毫素。著書臺畔秋正佳。月上桐孫滴清露。

汝南竹枝詞

吳清俊

汝埠人家烟樹重。河流如鏡壘如峯。登高士女年年願。看罷迎春聽勸農。
鴛鴦湖上鴛鴦多。採蓮人唱採蓮歌。歌聲散入花深處。驚起鴛鴦可奈何。
汝水流成錦繡水。西山結個玲瓏山。山山水水從郎問。儂在玲瓏錦繡間。
老農說古亦津津。晚飯篝燈語半真。蔡順孟宗俱孝子。那知都是我鄉人。

五言律

郡守費畊亭師爲家母題貞節純孝匾額。同邑余月軒文明、葉立初蔭、兩先生皆紀以長歌。詳叙家母割胸肉療先祖母疾。並推原祖母平生慈德。敬賦五律。呈兩先生以志感。

吳清俊

太守宣風化。先生闡德儀。遂從傳婦孝。隨在見姑慈。苦節冰霜久。高文日月垂。披吟增感愧。何以盡烏私。

王酉峯上舍自汝埠來。汴言家鄉殘破。逃難流離。情狀感而誌之。

吳清俊

話到春殘三月時。汝南埠寨不勝悲。馬蹄亂踏烟塵合。虎口重生造化奇。德曜奉夫真健婦。彭修愛父是佳兒。雷家堰壘遙回首。猶卓官軍義勇旗。

丙子十月九日移營赴項尉北鰲頭呂村留別。並與張仲徵兄約異日息壤焉。

吳清俊

昔別牽娘衣。今別哭娘墓。衣送紙香風。淚灑松柏樹。灑淚化蒼苔。重來痕如故。痕在樹應長。結廬塋前住。張公老夫婦。宛然親哥嫂。相依五六年。恩誼知多少。我母墓在斯。年年來祭掃。祭掃偶不來。一杯澆墓草。時時戒樵牧。樹木勿傾倒。行矣各加餐。兼拜諸鄰好。三姑老兄妹。妹丈同賃舂。外甥大共小。舅心豈不疼。今年苦荒旱。何以禦殘冬。兩女可暫携。一妹甯難容。休疑一尺布。昔縫今不縫。亦翁我老友。今之鄭廣文。鰲頭葬先母。馬鬣卜秋雲。誰歟重節孝。賢哉戶部君。先母列祠坊。貞石表崇墳。寄聲謝鄭公。闕典非

所云。癸亥我來尉。母卒辛未秋。半眷携南毫。甲戌歲將周。乙亥春二月。隨我秣陵游。丙子小陽月。我歸自滑州。遂挈尉眷來。秣陵車復舟。來此共飢渴。踪跡等浮鷗。客中仗友朋。新舊皆綢繆。新者不我棄。舊者望我留。以此感寸心。淚下不能收。願得數來往。千金買驩驩。

卽景

姻文詩

吳清俊

秋風晚樹滿飛鴉。倚杖藤牆半日斜。舟住近灣隨鶴棹。網移閒浦聚魚叉。樓邊水繞村林出。寺外峯連野岸遮。遊興乘時除草徑。幽籬淺碧露黃花。

其二

花黃露碧淺籬幽。徑草除時乘興遊。遮岸野連峯外寺。出林村繞水邊樓。叉魚聚浦閒移網。棹鶴隨灣近住舟。斜日半墻藤杖倚。鴉飛滿樹晚風秋。

貞媛詞并序

吳清俊

羅山儒士張時育。聘同邑杜氏。未娶而張殞。氏聞之。自誓以死。不則歸張守志。

氏母已歿。父兄知不可奪。乃以氏歸張。歸事太姑。姑舅繼姑。歿存如一日。舅勉學。邑茂才。有幼子女各一。氏婚嫁之。幼子亦早逝。遺一子。兼伯若考之祧。氏老矣。偕孀娣持家教子。邑人士皆曰賢。爰系斯詞。俟司彤管者採焉。

女貞之樹樹高堂。下覆庭階蔭正長。張氏老嫠杜家女。能將節義植綱常。聞道妙齡矢從一。朱陳嫁娶何曾畢。郎君殞歿慘于歸。從此國人傳漆室。父作儒生母氏賢。瓊瑣蘭蕙倍嬌憐。尸還陰姓何辭死。志遂共姜喜諒天。丫髻學鬢拜姑舅。請將男兒視新婦。六親不用更相疑。歲月百年看事後。百年依戀事重慈。風木猶存孝子思。葬罷阿翁奉阿母。半生家政手親持。記得來時小郎小。小姑相並依邱嫂。收將清淚盡提携。書卷絲盤人易老。青春歸妹叶佳占。黃竹打筐辦鏡奩。叔姒生男旋報與。雙親尙在喜頻添。卽今翁老雖長往。一顆明珠擎兩掌。教子還如教叔時。興宗事業看成長。青綾步障難重陳。畫荻和丸藥褻親。百歲重泉見夫婿。一生辛苦未亡人。羅山山水清且淑。羅邑東關訊邦族。我歌此曲表貞媛。颯颯天風響霜竹。

甲子冬日送友人程子鶴還蜀

邑舉人
程鶴 黎鴻猷

數聲杜宇促歸鞍。萬里遨遊興未闌。閨苑花光今看遍。蜀江棧道古來難。一鞭風緊郵程疾。五夜霜清客袖單。計日還家承色笑。夢魂先到白雲端。

其二

黎鴻猷

底事青年賦遠遊。八千里外覓封侯。請纓未遂終軍願。贈綈難消范叔愁。蜀道聽猿勞夢寐。秦關走馬計程郵。定知此去風波穩。高掛雲帆指益州。

其三

翩翩少年竟多才。共我盤桓日幾回。百斛龍文輝上苑。千金馬骨重燕臺。當筵忽聽驪歌唱。別酒重徵燕語陪。記取他年高捷後。秋光先送好音來。

其四

黎鴻猷

久聚翻愁話別難。送留無計共盤桓。蜀江愛日關心切。易水驚風撲面寒。十九年華人落落。八千里路雪漫漫。故園花柳今何似。歸去須憑慧眼觀。

其五

黎鴻猷

贈罷將離贈可離。幾番歸去故遲遲。論交舊雨兼新雨。惜別紅兒又雪兒。萬里鄉雲常入夢。一輪邊月爲催詩。此行若問重相見。得意長安走馬時。

和葉葛民同年瓠城感舊兼懷隨園主人之作卽步原韻

黎鴻猷

憶昔歡陪硯席邊。羨君才調本如仙。西窗夜話常携酒。南浦春遊不繫船。客邸何緣逢舊雨。故鄉無那各荒煙。蕭蕭鬢髮半衰老。回首同堂已廿年。滿地榆飄不值錢。吟香閣外畫欄邊。鴻飛上苑剛三載。燕託閒巢已二年。春去落花空自舞。秋深明月爲誰圓。燕臺北望頻翹首。攀鳳無從有夢牽。

黎安寨悶坐襍感

黎鴻猷

辛苦塵緣歲月更。茫茫天意悵浮生。休言文士多迂拙。從此詩人少性情。

余自亂世後作詩全無

與會山徑已荒無我用。硯田雖在有誰耕。離騷讀罷擁衾坐。一枕淒涼夢不成。

翩翩公子自風流。爭被塵煩擾不休。佳景都從愁裡過。明珠空向暗中投。漫誇俠氣凌

今古一任人間呼馬牛。卻笑腐儒多齷齪。掛冠終日效獼猴。

無題

黎鴻猷

故園株守作家雞。枯槁形容面目鰲。升斗乞人腰屢折。茅簷容我首全低。語言鮮聽常

關口。

故鄉人無可與言者

詩稿殘留懶命題。多少爭巢忙不定。鷓鴣幸有一枝棲。

余在寒中住草房三間終日閉

出門不出

遊銅鐘王氏花園蒙小川主人見贈卽步原韻

黎鴻猷

聞道前車有指南。今朝破冗共清談。一庭花鳥幽堪賞。滿架圖書奇許探。久別相逢應自喜。先施未報轉懷慙。生憎連夜梨花雨。羈我征人久駐驂。

題王氏花園留贈小川主人

黎鴻猷

見說園林勝。行行到草堂。四圍環黛色。一院聚春光。地僻塵都淨。花深夢亦香。此中高臥者。直欲傲羲皇。

其二

黎鴻猷

直到花深處。幽棲晤小川。境原無長物。人自樂吾天。巨眼空今古。高志懷聖賢。西窗連夜雨。翦燭話前緣。

其三

黎鴻猷

託足紅塵外。園中俯仰寬。蒙童三五個。修竹萬千竿。花石共幽賞。林泉恣飽看。浮名何足慕。世外樂盤桓。

其四

黎鴻猷

地迴塵難到。高人宛在茲。座中無俗客。案上有新詩。好鳥皆吾友。修篁是我師。此間多樂趣。未許達官知。

咏菊花十首

黎鴻猷

秋老羣芳搖落時。東籬臘有傲霜枝。家貧菊亦憐開瘦。地僻花堪共守痴。位置半渠琴與鶴。殷勤餽我酒兼詩。還來夙有重陽約。好結同人共賞之。

其二

黎鴻猷

傲骨經霜冷自支。清於老鶴淡於詩。生來正色不知媚。洗盡鉛華別有姿。掃徑恰當花綻後。開樽且喜客來時。園林近日多蕭瑟。特爲重陽發滿枝。

其三

黎鴻猷

霜落空山獨閉門。爲卿日日往還頻。一樽酒滿來知己。三徑秋深訪故人。氣味差同蘭有臭。居停慣與竹爲隣。高高位置君休怪。瀟灑從來不受塵。

其四

黎鴻猷

傲骨峻嶒絕點塵。陶家風味本來真。多因耐冷成高致。翻爲經寒得久春。瘦與梅花同骨格。淡宜月色長精神。孤芳莫道無人賞。把酒前曾約比隣。

其五

黎鴻猷

漫言水郭與山村。我有幽香且閉門。三徑秋來添客興。一窗月照醒花魂。耐寒羞借金爲屋。避穢權資玉作盆。卻笑牡丹空富貴。於今何處覓香溫。

其六

黎鴻猷

西風搖落悵羣芳。天意偏留晚節香。半畝開如秋冷淡。一生閱盡歲炎涼。慣貧不作豪華想。避俗羞爲時世妝。任彼旁觀多毀譽。常將本色對斜陽。

其七

黎鴻猷

小園鎖日獨徘徊。幾度秋風吹不開。掃徑爲遲佳客至。捲簾忽報癯仙來。神爭秋水顏爭玉。清比蓮花瘦比梅。聽得隣家新釀熟。連朝詩酒共追陪。

其八

黎鴻猷

最難忘是半開時。淡雅宜人別有姿。三徑秋深供嘯傲。一庭月朗費吟思。神清似水塵都淨。骨瘦如柴冷不知。案有琴書樽有酒。得君歲晚恰相宜。

其九

黎鴻猷

淡淡秋光短短籬。無多景物也清奇。一盃酒熟人歸後。四壁花香客到時。顧我清貧聊復爾。憐君消瘦竟如斯。陶公高趣傳千古。如此風流想見之。

其十

黎鴻猷

莫道山家太寂然。冷香原不受人憐。亭亭玉質當風立。皎皎瓊姿帶露眠。半畝長邀松作伴。一生慣與酒爲緣。何須更索梅花笑。修到如君卽是仙。

感時

邑貢生 李承桂

從來可怕是兵災。水火相連更足哀。撲地災威方滅去。漫天巨浪又衝來。延城舍宇如齏粉。附寨骷髏作死灰。還有飛蝗傷禾稼。何時能復頌康哉。

傷亂二首

邑貢生 張嘉運

梟雄結隊從東來。勢等豺狼吞噬災。田被踐蹂苗入土。市經燒燬室爲灰。成渠血跡千秋恨。橫野屍踪百姓哀。最苦流離失所者。蒼天訴去空徘徊。寰宇承平二百年。邇來連歲遭烽煙。滄桑果是能更易。陵谷居然有變遷。戰壘紛紜良可痛。民生憔悴劇堪憐。何當兵氣全消後。依舊讀書並力田。

遊黃公祠墓

邑拔貢 卓壽山

黃公祠墓枕城隅。不知何歲創室廬。西北雉堞依屏幃。當門流水漾清渠。漢家黨錮三

千年。范滂幽恨埋樂山。在陝西惟有孤鴻見色舉。全身坵首留人間。墓門碑碣年代無。兩

淋日炙苔蘚枯。五字深刻象奇古。記名魯郡顏公書。顏公白首遇希烈。崎嶇坎坷勵忠

節。未知何由得奮筆。文獻既夥無從說。乾隆甲申紀功立。碑詞上溯明中葉。光緒十年

又甲申。少府鳩工重泐石。黃少府煇重修記石干支歲合若符節。修廢舉墜今未歇。未悉嫡派屬

何人。大宗小宗無從說。邑南黃姓家譜無存自謂叔度公後裔我來旅寓近祠南。旬日追遊得二三。幸與

居人消鄙吝。欲尋隙地留茅庵。

弔烈女李參姐墓

卓壽山

慎水之陽龍岡側。化爲蒼梧湘水碧。天生正氣扶正陽。不在男兒在巾幗。我來墓門急
撫視。篆石青葱土花紫。河鼓洲中駕鵲歸。鴛鴦湖上會雙死。死灰不起貌如花。道韞未
歸王郎家。劍墜雷淵龍拔地。珠沉滄海玉無瑕。女兒本是女貞木。寄語高堂休慟哭。誓
將離恨訴青鸞。肯訴哀吟續黃鵠。烈士徇名事或偶。烈婦殉夫古亦有。異哉童男卯女
不相親。能以伉儷篤性全其真。太史探風播管絃。如此千秋下筆難。聊撫詩人語。獻作

篋篋彈紫玉歌。韓憑樹。因緣簿上。前生誤。連理枝頭。化血殷。便是貞女全歸處。
參姐城南街。李秀清女。幼字王均。禮子邦泰。未笄。邦泰死。誓不再字。痛鬱殉節。葬南
龍岡側。北關另有節烈碑。

輓葉葛民先生

卓壽山

霏霏露雨暗河津。雁杳魚沉信未真。梁木崩摧應有數。
豈無因。羣飛舞斷葛天氏。覺化悲深葉縣民。儘把詩書貽後嗣。當年南海答生麟。
久雨屋漏、棟字夜崩、哲人凋謝、驚悸得病、遂成不起。

公年四十年

祈南海大士生子今年二十餘矣

其二

卓壽山

奎林講院聽書聲。絃誦雍容樂太平。戶外聞歌皆弟子。琴中顧曲有先生。向禽同調常
相隔。溫李齊名任載賡。
黎靜庵與公晚年唱和鐵琴詩、公爲鑒定。一自仙音窺正始。從前學步厭塵羹。
公齋名紫

髮正始之關、

其三

卓壽山

文章太守作君師。公童年受費擘亭太守知、廉吏功名世澤垂。八愷高陽才子里。

其時題

曰高陽里、百年知己費公祠。

公謁費公祠詩云、千里招魂、勞父老、百年知己有先生、

籍咸風塵皆前輩。

族叔立初先生、著作甚富、辛酉

殉、軾轍詞華繼昔時。玉樹歌殘歸淨土。可能埋得鮑家詩。

公清明詩云、今古悠悠行復、爾、未應埋得鮑家詩、見續刻

其四

卓壽山

田園寥落遇干戈。長爪鳶捎燕子窠。杜老狂歌惟縱酒。堯夫安樂有行窩。公避亂居傅岩、四朝

其五

卓壽山

奎殿陰塵上畫梁。

村東文昌閣、久經荒廢、

北陂草樹盡荒涼。

公移居詩云、瀟明居南村、今子移北陂、

英魂地下遊京

闕。寒食天中憶洛陽。

公在洛陽、有寒食北邙放歌、

一字未安經鍛鍊。三年辛苦費平章。

福亭詩草呈、正、三年携回、

金針度後才先盡。長使披函淚數行。

公遺囑手寫贈言、命兒子封寄、每一開函、爲之潸然、

輓吳和生孝廉前輩六十韻

卓壽山

公諱清俊、號章民、邑東汝埠人、博學能文、駢體尤富、晚著詩古文詞、與邑北葉葛民齊名、初以優貢、爲鄭松峯撫軍招致幕府、名噪省垣、壬戌舉於鄉、不樂仕

進、往來於開封陳州等屬、卜居項城、遂家焉、年七十、卒太康署中、甥王氏讓、樞回籍、余登其門、茅屋蕭然、撮叙生平、賦詩誌哀、不覺其言之長矣、

過眼文星落。傷心舊雨亡。人才鍾汝郡。邑乘誌真陽。依舊貧如洗。從新苦倍嘗。撫嬰勤

紡績。刲股奉姑嫜。

太夫人刲股愈姑病、以孝德請旌、名士題詠、

孝德名媛著。貞心後嗣昌。芬芳傳孟母。憔悴

報姬姜。弱冠馳名譽。寒門憶顯揚。陸機文賦早。司馬史才良。獨上金篋刮。頻邀玉尺量。

聲名超九縣。

公少應歲賦、屢冠九屬、

摘藻豔千行。芳草吟書帶。生花夢筆牀。學優堪應選。時晦漫

騰光。縱有遺珠恨。何能韞櫝藏。劍輝吳季寶。門顯鄭公鄉。風雨棲蓮幕。雲霞佐繡裳。參

軍貞亮著。長史姓名彰。政績資匡輔。謨猷憶贊襄。郗賓稱幕畫。毛穎露錐囊。試院掄才

日。新恩選佛場。鹿鳴開宴樂。鳳羽著文章。再赴公車召。頻登薦士房。燕南期奮翼。冀北

快騰驤。未許題金榜。安能貢玉堂。卞和空洒淚。羅隱趣歸裝。白首青雲臥。蒼苔屋社荒。

五斗誰糴米。三徑少資糧。經義推胡瑗。公儀屈范滂。上書雖薦禰。抗疏竟遺匡。

鄭松翁保舉教

授竟遺部取

資格奇才困。功名要路妨。賈生辭魏闕。陸氏返荒莊。山澤觀魚鳥。桐陰仰鳳凰。

交遊通縞紵。名望重圭璋。當道爭羅致。凡才孰頡頏。昂頭逢伯樂。倒屣迓中郎。泌水棲

陽夏蓬池詠大梁。見聞收耳目。傾倒揭肝腸。下榻陳蕃寵。登牀杜老狂。青鐙分座寫。綵管校書忙。採擷經兼史。標題目與綱。山川人物考。風土歲時詳。公佐修陳州開封屬邑志高可箋星象。深能測海洋。版圖分畛域。品類別低昂。記室才將老。登樓興倍長。暮雲懷李白。秋水望葭蒼。說項人猶在。晚移居項城歸陳志未忘。傳聞猶老健。得信已驚惶。市上銘旌出。門前素幘張。憐才皆歎息。感舊獨哀傷。憶我方齟齬。逢君拜典常。詞章披錦繡。文采集縹緗。手澤存著蔡。心源奉瓣香。薪傳私淑進。蘭臭異時芳。自作春風接。還思永日將。索居魂已遠。親炙願難償。月墮沉沉色。星流作作芒。撫琴悲往事。相杵噤新喪。弔客青蠅集。升天白鶴翔。荒郊埋玉樹。遺稿拾巾箱。鳴鳳朝陽落。啼鴉夜雨涼。典型零散盡。催我鬢毛霜。

哭黎筱鶴親家廣文先生

卓壽山

聞臺星隕大河陰。風雨柴門雁字沈。座上丹砂隨鶴化。匣中寶劍泣龍吟。旄邱未倦流離興。滄海猶存壯士心。戚舊情深兼姻婭。過時魂夢費追尋。

其二

卓壽山

捧檄折腰屈爲親。廣文不就自安貧。

先生已就縣職。值庚辰挑場。請禮部奏銷。應試一等教職。註名告歸。

東山白首依前

哲。北闕青雲步後塵。祛疾未能消半夏。

先生病疾。嚙者一年。

嘸枯還望再回春。

去年病者言。來歲可瘳。

文章

交道成千古。除卻任黎誼最貞。

壽幼時所心折者惟先生。任少駿。孝廉兩人而已。

其三

卓壽山

雪泥鴻爪暗江湖。千里歸來猿鶴呼。家累却從兒失學。時衰翻受鬼揶揄。回戈落日心

猶壯。築室居廬志已虛。賴有曹家音懿範在。傳經親授藐諸孤。

夫人曹氏。素昭闢範。

其四

卓壽山

心香一瓣祝南豐。見說淵源吾道東。什襲珍藏遺片羽。啓盧煇綴下孤鴻。中年以後情

難遣。悔過從前恨不終。寸莛擊鐘聲未出。略將德行表言功。

諸門人同立德。教碑。免余作序。

題吳氏姊妹節孝坊

卓壽山

靜守髡髮四十年。柏舟矢志勵冰堅。湘妃竹上千秋淚。婺婦室中萬古傳。同穴丹心盟

皎日。凌霄華表蔚蒼煙。人生似此足千古。愧煞男兒一世賢。

其二

卓壽山

閱盡冰霜雨露深。延陵家世記碑陰。波安古井狂瀾定。氣奪明珠節婦吟。青史猶傳當日事。白頭不改嫁時心。漸台漆室貞魂在。總是生前敬戒箴。

十方院與葦航禪師夜話歸途遇雨宿阮述臣書齋

卓壽山

自有慈航渡。何須一葦通。香流禪室榻。煙鎖梵王宮。朗月思元度。高風挹遠公。夜深歸去晚。花外雨濛濛。

其二

卓壽山

漏下嚴城閉。風掃佛殿秋。扣門無醉尉。隨遇有丹邱。樹影迷香界。鐘聲渡石樓。還將阮孚屐。秉燭夜深遊。

過藏靜園

郡增生防
魏 杜

攬轡西來訪逸公。竹林深處路微通。拚醺藏靜園中酒。好披臨淮塞上風。帖塌雙鉤迷

曲。虬。琴。彈。百。納。感。飛。鴻。切。消。南。宋。無。餘。子。誰。信。今。還。有。放。翁。

避捻亂感事書懷

一 邑貢生 魏光大

萬里煙波一葉舟。投竿結網度春秋。生涯只傍江湖老。身世不參名利謀。水底魚龍看隱見。天邊日月共沈浮。時人那解漁翁意。夢醒嚴灘樂未休。

藏靜園八景之三和潘蔭堂原韻

魏光大

月橋綠柳

鶯燕啼將罷。欄杆冒綠陰。夕陽無限恨。寄與月初沉。

靜山奇石

魏光大

白髮支離叟。皴皮又露筋。醉來眠石上。還讓瘦三分。

靜台聽松

魏光大

遠籟搖空碧。聲牽野寺鐘。更深人不寐。斜月正溶溶。

春遊遣興

魏光大

行行且止欲何之。沂水春風有所思。免俗未能聊復爾。關心逝者已如斯。物因同化皆吾與。人以從遊是我師。觸處會心不在遠。一鞭得得馬蹄遲。

過居庸關

民國二年北遊

邑拔貢
春源 魏松聲

居庸自古稱天險。山勢奔騰拂面來。路闢雄關作鎖鑰。洞穿鐵道走風雷。峯頭秦氏長城壯。塞外胡兒伯業衰。五族共和國體變。沿邊門戶此先開。

遊長城

魏松聲

經營帝業築長城。想見秦皇伯業橫。聯貫羣山防豕突。袤延萬里類蛇行。不開公主和戎路。阻斷胡兒嘶馬聲。詎料英雄起草澤。頻頻篝火作狐鳴。

丙辰秋旅汴重與任雪岑晤聚蒙詩留念走筆和之

前人

都門握別已多年。眼底風雲幾變遷。血漲江淮淘國體。郊叢戎馬闢民權。桃源禍避三弓地。虎口生餘一線天。滿目瘡痍仍未起。河山回首總淒然。

龍亭懷古

魏松聲

道從何處問虧盈。翔步龍亭覘汴京。趙宋河山天不眷。樊樓燈火夜無聲。四圍湖作興亡鑑。百尺台含淡遠情。的是前朝歌舞地。盛衰成敗認分明。

登洛陽天津橋

魏松聲

淚雨滂沱洛水深。誰憐賈傅救時心。橋梁留得血痕在。知有蜀鵲啼到今。

同學陳星垣一別十年賦以誌感

魏松聲

十載風雲皆險惡。雪霜已向鬢毛侵。天翻地覆狂瀾倒。露白葭蒼秋水深。破碎河山遊子夢。迢遙歲序故人心。何時得翦西窗燭。再奏伯牙一曲琴。

劉羣士以萬年青開花四絕見示既和四絕復爲長歌寄之

前人

枝葉青葱色不老。有花爭似無花好。夜來聽到風雨聲。那用花童三徑掃。抱樸含貞自在遊。萬年松柏許爲儔。饒他弱柳垂青眼。不羨楊花逐水流。可恨花神一着錯。忽教綻蕊又抽萼。平時不願伍夭桃。也逐東風花灼灼。色相媚媚失莊嚴。開時容易可憐落。開開落落不自由。剝喪主權竟奚若。吁嗟復吁嗟。何如名列花籍花不花。跳出花界枯榮

外。雲中雞犬自爲家。饜飮清晨露。披拂傍晚霞。高踞青山山作伴。青雲有路路不賒。銀河飛渡來玩賞。好坐青皮一葉槎。

遊三台洞

在南京東北十五里

魏松聲

洞天名位列三台。拓出神仙境界來。頂上天光一線入。空中梯道五丁開。石懸嫩乳流還滴。檻拂長江去若迴。十丈紅塵飛不到。卜居休再羨蓬萊。

海寧觀潮

魏松聲

江流倒捲海門開。滾滾濤聲振地來。天影低垂沉日月。浪花飛濺撼風雷。鮫人是否騎鯨至。伍相疑曾控馬回。動極偏宜能守靜。波搖砥柱永難摧。

遊西湖岳墳感賦

魏松聲

挹盡西湖一湖水。難洗靖康南渡恥。金牌一到便班師。岳侯鑄錯始於此。倘擁旂旄出漢關。犁庭掃穴滅完顏。強敵帖耳作臣妾。二聖定然得北還。迎還二聖勳名重。足使權奸生畏悚。何至獄成三字冤。西湖隄上埋荒塚。荒塚盤桓感慨多。鐵鑄奸像也嫌苛。饒

他罰作千年跪。補得亡國恨幾何。時至國亡君何有。以國爲先君可後。試思敵馬立吳山。何如痛飲黃龍酒。義重君臣誤岳侯。遺恨未報金人仇。英魂洒盡黃泉淚。湖水嗚咽不忍流。

西湖飛來峯

魏松聲

峯自何時何地飛。飛來此處復何歸。移山有志愚公老。頑石多情故土違。接近西湖作伴好。挾超北海寓言非。崑崙葱嶺一回首。萬嶽千崖春日暉。

謁南京烈士祠

魏松聲

救國常先天下憂。英魂凜烈足千秋。推翻帝制憑空手。掃盡胡塵寧斷頭。任洒鬼雄無限淚。未忘國恥不勝愁。請看廟貌秋風裏。蕭瑟哀聲與耳謀。

讀淮陰侯列傳

魏松聲

覆楚滅秦作漢臣。登壇大業有誰倫。將軍相背真良策。賊后工讒種惡因。功到分茅能震主。計成烹狗便亡身。至今風雨淮陰路。過客猶聞話劫塵。

牛首山觀音洞

魏松聲

慈悲何處覓觀音。士女偏饒迷信心。山洞荒涼石磴古。蓮台高聳暮雲深。寺僧慵掃蒼苔路。神話空傳紫竹林。牛鼻有泉瓶注水。渴來較可滌煩襟。

重濬古龍池得雨題碣志慶

知縣鈕雷

湮沒龍池二十年。潢源不透慎陽田。濬開深井同幽谷。蒸起靈雲上九天。布澤式憑泉一勺。護祠圍得水周圍。柳陰非爲垂竿設。應衆魚成入夢緣。

七月十六日畏病行野知雨害嘉禾感賦

光山晏卓

館寄愼水南。數月窘陰雨。冬植冰剝傷。春播水漬腐。氣沴場麥瘠。香炊餅餌苦。時再值小暑。大雨漲河渚。矮屋盡崩塌。窮民切痛楚。溝渠濤浪滾。勢欲合淮汝。遍野好禾麻。可惜難耘耔。大尹日催科。不暇憂稻黍。願早開溝洫。無壅港邊土。旱澇縱年年。禾稼仍盈貯。倘竟隳禹功。閭閻恐餓殍。

冬歸留別張紫宸

晏卓

我與紫宸子。訂交三十年。形迹迥不同。心性共瑩然。坦懷以相與。切磋幸有緣。君學素博雅。論斷無頗偏。風度含雍容。和氣藹無邊。我性多放曠。言語近狂顛。每以慙直氣。牴觸向人前。君喜我無僞。指摘我尤愆。我重君敦樸。事事見真詮。至今同潦倒。彼此老山泉。君心仁愛深。情爲事物牽。扶危救傾覆。閭里賴安全。和似柳下惠。袒裸任比肩。莫能易其介。持守若定堅。我好作詩歌。信筆書便便。率易平且庸。神韻少華鮮。愧無精研功。貌襲白樂天。老嫗雖能解。不克繼唐賢。雞林有賈人。莫肯售一錢。君年五十七。衰病時糾纏。我年七十五。頹敝無人憐。君幸有佳兒。繼述克永傳。旋見大門第。厚福慶綿延。我兒頑且頓。徒勞辱蒲鞭。雖得良師友。辜負故青氈。後世都難知。日月漸推遷。願君普樂利。與世長周旋。我仍肆歌嘯。牖下樂長年。今將與君別。宛似藕絲連。聊作留別詩。以慰心懸懸。

別馮華閣

晏卓

人生訂交誼。皆以前因合。倘無宿世緣。邂逅交臂失。憶自丁酉年。我與君相識。一見便

投契似欲忘形迹。次年共筆硯。肅肅門牆立。愧我牆及肩。一窺見家室。幸君採泮芹。雲路將連綴。不圖近十年。青衫困蓬華。我年漸衰老。尙蒙青眼覲。我性好山水。君常共游歷。山高與水深。不憚窮幽僻。前歲適我里。同遊過羅邑。三宿抵君家。笑談快朝夕。又結來歲緣。延教童子輩。自愧太姑息。未稍盡心力。竊幸知性情。不肯過爲責。童子質聰穎。預知非凡器。將爲國楨幹。青史書勳績。我病七十日。寒熱遞迫逼。倘天假之年。卦爻宜剖悉。干支聯一氣。克見天地秘。後會日正長。願君無厭斁。不時過我廬。終始相關切。我兒雖冥頑。似可通聲氣。座我碧山頭。無今水泉漬。言別寫情懷。渾忘詞語摯。

十一月二十六日東歸渡淮

晏卓

新晴沙壓舊長干。亭驛遙遙度影寒。兩岸烟沈斜日暮。一天風蕩大溪寬。津梁濡沒行人聚。車馬奔馳喚渡難。覓得輕舟搖快楫。笑談飛過險波瀾。

予以乙未春公車北上。四月杪出都。過大名。訪清豐宰石君。留署內。旋調平山。卸任回保陽。七月望後。由保赴平。半歲間長安道上。往還者再。征途有感以誌之。

雞聲乍唱客心驚。車馬勞勞赴遠程。曉月隨人猶似夢。秋聲入耳最關情。底事輪蹄頻往返。何年德業煥動名。京洛風雲幸際會。青袍終不負儒生。

邑舉人 德涵 余海峯

重遊平山龍王堂

余海峯

四望雲山倦眼開。濤聲風影幾徘徊。嵐光遠近天邊活。秋色蒼茫樹裡來。地隔塵囂風尚古。人安耕稼俗無猜。何當買宅烟深處。選勝尋幽遍水隈。

題平山署內翼然亭

余海峯

亂峯高下聳層雲。治水西來平野分。山色直從檐外見。濤聲却向枕邊聞。地僻何嫌廉俸儉。風清總為長官勤。偶上翼然亭畔望。無邊爽氣滌塵氛。

題平山署旁養泉

余海峯

窗間曉色未分明。枕畔時聞轆轤聲。一縷重泉通治水。萬家待澤說平城。源惟有本常無竭。性不矯廉韻自清。利普羣生憑井養。恩波被處已忘情。

滄州署後補山樓晚眺二首

余海峯

登樓晚眺海天空。秋色寒煙夕照中。北去千艘通帝闕。南來巨浪隱長虹。魚鹽共說長蘆利。獷悍猶存渤海風。煙水蒼茫雲霧裡。扶桑遙指大瀛東。

其二

余海峯

茫茫大野煙靄中。歲暮天寒號怒風。地近沮洳成澤國。利饒灌溉重秋菘。東連渤海民稱竈。北拱神京鎮自雄。古道斜陽憑眺處。故鄉回首意無窮。

海天多風暮春寒甚夜不成寐感而賦此

余海峯

暮春欲盡花事延。海國陰晴別有天。呼吸長風恒激曉。朦朧殘月不成眠。閭閻歲切其魚歎。官廩常糜放賑錢。漫說漁舟羣競利。春深半有未耕田。

秋夜有懷

余海峯

幾年奔走悔風塵。回首鄉關入望頻。汝墳秋風千里夢。燕臺孤月斷蓬身。寒螿有韻愁依枕。旅雁無情倍愴神。半世浮沉成底事。此生碌碌愧因人。

秦中懷古

余海峯

茫茫煙樹接城隈。渭水秦川寔壯哉。百二雄關天險在。於今世運幾興衰。

函關道中

余海峯

纔過潼關又函關。千里形勝指顧間。一綫崎嶇蜀道路。萬峯蒼翠晉雲山。

曉渡洛水

余海峯

飄零客路悲故鄉。車馬風塵日日忙。多少名勝游不得。匆匆又過古洛陽。

謁關林有懷

余海峯

三分割據炎漢衰。坐鎮荊襄仗異才。結好如何長策乖。中興大業已成灰。

其二

余海峯

單刀匹馬鬼神驚。的是炎劉萬里城。馬革裹尸何足惜。楚水吳山恨未平。

其三

余海峯

忠魂灑氣已千秋。到處馨香遺像留。爭說福田徵果報。英風猶自驚庸流。

秋夜感懷

余海峯

一派秋蕭瑟。旅懷竟若何。亂峯圍平野。遠水繞山阿。捲地風聲急。穿林落葉多。鄉心縈汝岸。客路滯溇沱。世事付流水。光陰感逝波。空負平生志。歲月又蹉跎。

胡貞女

邑廩生子光 李春耀

昔聞北宮女。守貞志不渝。芳名高齊國。懿德重當途。偶過新息里。見女採蘼蕪。一女情獨別。操心與衆殊。景仰嬰兒子。願與古爲徒。借問女何氏。僉云女姓胡。阿女勤緝績。札弄紡車。阿女善烹飪。簸簸理香厨。不修翠鈿玉。不飾紅羅襦。誓作閨中女。恥爲外人奴。漫嗤乖常道。奇節古今無。憐我慈母邁。憐我弱弟孤。唯知勞家政。那惜千金軀。弟來親長姐。姪來愛老姑。胡氏家道頽。有女手堪扶。雖曰巾幗子。差稱女丈夫。光陰何迅速。年已五旬餘。皎皎淑媛操。冰心在玉壺。曲衷誰可識。明月照庭除。彤管采帙事。愧殺在彼姝。引領淮北望。染翰費踟蹰。

九日

邑廩生子清 余海泉

何處登高去。郊原且放歌。霜清流水靜。木落遠山多。紅樹連淮岸。黃花滿野坡。西風何太急。吹雁愼陽過。

秋景

余海泉

梧桐葉落客心驚。一歲秋光一歲情。霽雨斜陽山盡出。清霜冷露水初平。蒼蒼蒹葭連淮岸。淡淡園林見愼城。極目蕭條邊塞地。長空一帶雁南征。

秋聲

余海泉

林間淅瀝送秋聲。坐對寒窗不勝情。笛奏蕭條村遠近。砧催落葉影縱橫。檐前寂寞鸚鵡喚。戶外淒涼蟋蟀鳴。傾耳荒村蕭瑟處。烏啼月暮夜三更。

擬杜子美秋興八首

前清辛丑歲。子秋來無事。偶讀子美秋興八首。見此老既不遇于時。又流落于外。遭時喪亂。補救無權。徒寄悲傷而已。子

不揣固陋。亦有傷秋時事之心。聊擬八首。非敢曰比于子美。亦所謂不平則鳴云。

余海泉

天高野闊風颼颼。萬里江山一色秋。曠野淒涼收禾稼。遠村慘淡見梧楸。寒鴉薄暮排奇陣。旅雁斜陽起戍樓。杜老平生多感慨。傷時不勝帝京愁。

繁華閱盡實材呈。萬寶秋來正告成。稚子無知方慶稔。老夫深慮倍傷情。豺狼當路釀
奇禍。狐狸憑權虐庶氓。偶上古城閒眺望。小儒頓發不平鳴。
風聞燕趙聚犬羊。百二山河任猖狂。檀老長城今已壞。尹公保障又誰良。倉皇聖駕方
西幸。感忿愚民盡悲傷。掃蕩烟塵應有在。秋涼夜靜思汾陽。
淮西功業溯中唐。將帥同心撻伐張。涼國奇勳真罕有。晉公勝算在能強。從來善任人
皆奮。自古和戎禍已藏。野色蒼茫風景暗。秋高携手賦同行。
樓頭昨夜動微風。蕭瑟寒林響未窮。祖逖聞聲常起舞。班超投筆爲從戎。請纓無路英
雄老。抱膝有心志願空。惟欲尋求彭澤宰。陶然共醉菊花中。
知心常少獨翱翔。越過清溪又上岡。柿葉秋深紅似火。蒹花露潤白如霜。西堂作賦廬
陵感。南澗題詩子厚傷。不遇瞻時同一慨。况當晚節復昏黃。
悠悠汝水蕩微瀾。澤潤田疇露未乾。野老方矜長渠利。大河不擇細流難。竹松在夏無
奇色。蒲柳逢秋不耐寒。圖史俱陳心有在。郊原無事且盤桓。

重刊一陽集
秋來寂寞邀同人。汝水乘舟月更新。白傅潯陽詩有意。蘇公赤壁賦多神。蒼蒼岸蓼紅於染。采采洲蘆白更勻。國事搶攘何足計。任勞任怨有臣鄰。

寄居固城寺有感

清光緒末年

余海泉

數里荒城北臨汝。居人耕種盡禾黍。中有古寺規模宏。風霜閱歷幾寒暑。院宇傾頽徧蓬蒿。草木交加藏狐鼠。敗址頽垣修無人。斷碑殘碣字難讀。中殿後殿壞已盡。惟有西院僧作屋。鐘鏺埋沒棄不用。石像凋殘敬還伏。牛礪角兮樵磨鎌。遊眺一見難開目。嗟予飄泊已半生。乙巳年間居東廡。瓦礫滿院多阻門。蜘蛛結網紛繞戶。零落已甚難棲遲。命僕洒掃淨塵土。借問隋碑今何在。書法遒勁文意古。對言前僧偷鬻人。寶物失亡誠可怒。千年古蹟一朝喪。幽人來遊難再覩。神靈去兮土偶存。細柳芳草空復綠。鐘磬無聲香烟杳。居僧不畏晏安毒。予本窮困孤獨客。修補有心力不足。終年舌耕成何事。東西南北如罪流。况復此寺蕭條甚。片時居住如三秋。寄語同人休愕笑。神靈猶自暫埋頭。

六十自述詩六首

邑廩生 王道立

過眼光陰六十年。不堪回首憶從前。政勤遑計貧時困。學古安知文運遷。何處桃源尋梓里。而今滄海幻桑田。旁觀未解傷心事。猶慶長生不老仙。

其二

王道立

生來頑骨率真成。一任橫流直道行。未計衰殘添馬齒。惟憑堅苦懷雞鳴。嚴慈災險身求代。骨肉顛連死不驚。往事傷心空懺悔。暮年每念舊時情。

其三

王道立

辭家避難入燕都。十載變遷時事殊。骨肉流離書斷遞。田園荒廢賦加租。拒狼進虎甘亡種。捐盜開門自獻俘。隱患重重今四伏。睡獅大覺醒來無。

其四

王道立

盟血未乾又倒戈。逼人烽火亂離過。身閒家破餘齡老。戰禍匪氛外患多。救國雄心歸冷淡。回天壯志半銷磨。會當得遂假年願。援手羣英看若何。

其五

王道立

僚輩如予最不才。清風兩袖賦歸來。故鄉荊棘蓋藏盡。老馬桑榆志氣灰。未學解令名五柳。但憑餘蔭卜三槐。窮途幸獲承歡樂。視膳朝朝負米回。

其六

王道立

茫茫苦海墮塵緣。覺岸幸開普渡船。寶鏡常懸因卽果。迷津誰悟性中天。祇求樂道能修己。敢計傳經可象賢。舊夢新潮全不較。乾坤日月自團圓。

贈松峯鄭縣令昔在京師相交已久兼述往事以思來者

邑舉人立山

傅必端

儒林循吏兩相因。政事文章一一新。錦繡七篇先誨我。雷霆百里早驚人。琴堂漸息無情訟。梓里爭迎有脚春。從此汝南花滿縣。棠陰深處結芳鄰。

南港閒眺

邑庠生佑民

王芝蘭

漠漠空天壓地輕。無人僻境傍溪行。游魚遊鳥渾無累。野草閒花靜自榮。鬧市塵囂從此遠。鄉村俗氣到茲清。流連不計歸來晚。直待風涼趁月明。

重修玉皇閣祠

滿江紅

恩進士湯克顯

結閣凌虛。憑欄處、靄靄雲接。鎮銅鐘、億萬斯年。於今爲烈。千家車馬曉星馳。萬戶煙霞晨霧列。怎一旦、壞却梵王宮。空悲切。天之氣。猶未歇。地之靈。寧盡絕。鎮人文、重整玉皇金闕。十二樓臺浮金氣。三千諸佛呈瑞色。待他年、鳳誥下瑤天。榮旌節。

金石

明

像碑鐘爐

三聖鐵像

在宋店小亮寺。有鐵鑄至聖孔子、釋迦牟尼佛、太上老子三位坐像。高三尺許。明天順五年造。

鐵佛像

在鐵佛寺。有鐵鑄佛像一尊。因以是佛名寺。並以名店。

銅佛像

原係甘泉寺所供。寺久廢。清中葉時。北街武舉程廷臣家。連夜聞呼聲。查無事。迹疑有冤氣。因挖北城濠。得是像。有甘泉寺字樣。遂移置寺址。重修之。未久

又廢。清光緒二十六年。知縣潘守慶。訪故事。得此。暨甘泉井址。因掘而新之。寺址仍存。

鐵碑

在城西諸葛寺。高三尺。題明成化二年等字樣。

小亮寺鐘

高七尺。題有重一千五百斤。大明天順五年造等字樣。

鐵佛寺鐘

高四尺。重千餘斤。題有明天啓元年辛丑鑄等字樣。

銅鐘

在城南銅鐘鑄玉皇閣。鐘聲宏亮。能解羣迷。因以名是鐘。不知何時失去。故鑄造歷史無從考。

十方院鐘

在十方院山門外。高四尺。鑄字有列進王添智、楊氏住持繼。新蔡河陽保劉軫、蔡氏。大明萬曆十七年九月十五日造。

彌勒寺大鐘

在寺前院。

固城寺鼎爐

在固城寺大殿前。高丈餘。重量萬餘斤。爐面鑄大明萬曆十四年正月十六日造鼎爐。下文曰。固城寺肇於隋。盛於唐。而壽於宋。金十四年正月

雖曰有人。而鼎爐織獻未備。謂如來尊嚴之體。何以正覺。心佛心。行佛行者。蓋募十方而成爐焉。於中佛殿設供。宋誌不朽。國志明德云云。

瀉山鐵爐

在汪湖店瀉山寺中。重量五千斤。

造化爐

在城東北隅關岳殿前。形方四足。鑄題造化爐。大明萬曆二十年葉仲教等敬獻。

東嶽廟方爐二

一在東嶽殿前。二在東嶽廟山門外。鑄題明景泰年真陽鎮巡檢司某等鑄。一在東嶽殿前。二在東嶽廟山門外。鑄題明長方形。上覆下足。字題明時造等。

坊表

聚奎坊有四。在縣城大十字街。明知縣徐寬、爲進士李經、舉人王廷儒、何麟、董宗舒黎

來建。已廢。

宣化坊、在宣化街。已廢。

儒林坊、在儒學西。已廢。

雙璧坊、在迎春街。

即東大街

爲成化癸卯舉人劉廷璧立。已廢。

重光坊、在雙璧坊東。爲劉廷璧立。已廢。

京闈坊、在迎薰街。爲成化庚子舉人魯杲立。已廢。

進士坊、在迎恩街。

即北大街

爲正德甲戌進士李經立。已廢。

拔秀坊、在迎賓街。

即西大街

爲嘉靖甲午舉人董宗舒立。已廢。

文英坊、在壽仙巷。爲嘉靖辛卯舉人何麟立。已廢。

文魁坊、在循禮巷。爲嘉靖乙酉舉人王廷儒立。已廢。

登科坊、在迎薰街。

即南大街

爲嘉靖己酉舉人黎來立。已廢。

同知坊、在寒凍店西南七里。明爲荊州府同知劉延相立。

貞節坊、在迎薰街。明萬歷四十二年，爲陳嘉言妻盧氏立。已廢。

貞烈坊、在小東關。明天啟四年，爲段華黼聘妻危大姐立。

右錄舊志、本屆採訪各坊續列如左。

節孝總坊

在城內西門北民生街。節孝祠遺址前。清中葉建。是時節孝祠內享祀列女，均列名此坊。一同旌表。

許周氏節孝坊

清順治十八年，爲旌表許大金妻周氏建。

王袁氏節孝坊

在寒凍西南二里。乾隆三十二年，爲生員王維宸妻袁氏建。

李龔氏節孝坊

在城西街路南。爲旌表監生李慶雲妻龔氏。嘉慶四年建。

李謙姐貞烈坊

在西巖店。清嘉慶二十五年，爲旌表李元章童貞女。鄧永懷未婚妻。李謙姐建。入祀節孝祠。有傳。

潘蔡氏節孝坊

清道光十三年，爲旌表潘瓊妻蔡氏建。

葉傅氏節孝坊

在固城店。葉岡。清道光二十二年，爲旌表進士葉翰林再繼室傅氏建。

孫張氏節孝坊

在王牌寺西孫庄。清道光二十八年，爲旌表孫朝相妻張氏。孫朝聘妻鄒氏同建。

王陳氏節孝坊

清道光時爲旌表王錫妻陳氏建。

王李氏節孝坊 在銅鐘鎮。清成豐時爲旌表。李氏建。

吳卓氏節孝坊 在承興店。爲旌表。吳仰尼妻。卓氏建。

袁李氏節孝坊 在城西關南。清光緒七年爲旌表。袁方員妻。李氏建。

袁張氏令德宜民坊 在城南關外。民國六年爲旌表。農商總長袁乃寬母。張太夫人建。

孫門高大姐貞孝坊 在城外西南隅。民國十一年爲旌表。孫步瀛未婚妻。高大姐建。

黃姚氏節孝坊 在板橋店。爲旌表。黃斌周妻。姚氏建。

鄒孫氏節孝坊 在鄒余村。爲旌表。鄒輝璩妻。孫氏建。

朱楊氏節孝坊 在邱家店。爲旌表。朱光第妻。楊氏建。

余李氏節孝坊 爲旌表。余昭亭妻。李氏建。

李鄒氏節孝坊 在城東五里堆。爲旌表。李振拔妻。鄒氏建。其媳王氏節孝碑附側。

展李氏節孝坊 在岳城店。爲旌表。展明道妻。李氏建。

魏烈女坊 在增益店。

碑碣

漢

白玉碑

在朱店南顧廟前。石細色白。字跡銷磨殆盡。不能辨識。此地係東漢臨淮公故城遺址。此碑或即漢時舊物。

隋

固城寺碑

原在寺內羅祖殿。高三尺。寬一尺餘。面題隋開皇二年某月日立。下泐男盜心主。女邑子某妃等。字樣。碑陰鐫佛像數十。眉目活躍。清光緒九年。寺僧發賣於古畫行。商識者惜之。

唐

漢黃叔度墓碑

在城內西北部。黃公墓前。高八尺。寬二尺餘。正中大書漢黃叔度墓。五字。右側書顏真卿書四字。民國四年。袁紳家曠。裝木椁護之。近年椁墓。五好古人士。時往拓印。不設法保護。久將損壞。及今重修祠墓。安籌存古辦法。亦維護文化之一助也。

宋

創建觀音寺碑

在城內東北隅。明崇禎慶元王重修此寺。碑記內。有何氏奇曰。亂莽迷蔓。碑誌猶存。考之。有宋紹聖二年等字樣。今是碑已失所在。

禪塔碣

在南關十方院。金大定戊申。二十八年。殿中丞朝散大夫某名。字多烈。餽。不易辨識。

元

東嶽廟碑

在城東關外東嶽廟。題大元至大二年。光州訓導張瑄文已入志。真陽縣尉虎都魯別書。

創修泰山廟碑

在東關東嶽廟後院西部。碑高三尺。寬二尺許。題有大元至大四年。歲次辛亥。擬建泰山廟碑記。廟主陳慶瞻。廟地址四至邊界等。字樣。文不

雅明。茲不備錄。

明

重修觀音寺碑記

城內東北隅。簡稱小寺。今改為關岳廟。門外大碑二峯。均高八尺。寬二尺餘。下承巨石最屬。東一碑。上題崇禎。藩慶元。王重修。下題大明。嘉

靖十五年十月望日。等。字樣。餘詳藝文志。

重修三教春秋樓碑

在今關岳廟門樓東北隅。簷下。上題大明。萬曆二十年壬辰。三月哉生明。下書文林郎知真陽事董三泰。典史王棟。教諭鄧景濬。貢

生葉仲傑。居士葉仲敷。舉人葉調。子生員葉溥。葉沾。

修古龍池碑

在古龍池院門西山墻內。上題修古龍池碑。記稱是池係元代發現。中有神物。真能興雲致雨。云云。下題大明。隆慶二年某月日立。

濟瀆祠碑

在東嶽廟前。是祠即古龍池。龍神祠。文稱龍池於元時忽然發現。猶濟水之出。沒無常。未必非濟之潛流。及此而出。故名。其祠為濟瀆云。

重修萬壽寺碑

在汝南埠西南。薛寺村外。廟台基址宛然。尚在。文係進士劉鉞撰。字多剝蝕。莫辨。明正德五年季春。月立。

重修東嶽廟十殿碑

在汝南埠東嶽廟。明萬曆戊子年孟冬月立。劉本順文。詳藝文志。

萬壽寺碑

寺在油坊店北。進士知梓潼縣劉鉞撰文。追述明景泰五年。僧文全、暨誠、俊、佛、聰、佛、容等續修事。明正德年間立。

創修黃公祠墓碑

在城西北隅黃公墓前。明嘉靖甲子年知正陽縣事周紹稷建。文詳藝文志。

改青蓮社為十方院碑三

在南關十方院前院。高八尺。寬二尺餘。文係大明天啓六年。五臺山獅子窟竹林澄公。月川和尚題。叙邑人青蓮社長李芳。創建十方院。經程規約。字跡頗佳。是院又有崇禎庚午辛未二碑。文係翰林院編修何瑞徵撰。叙李芳修。先購此碑。改爲十方院。詳史。

創立青蓮社。後又改爲十方院。詳史。

關侯廟碑

在南關關侯廟。高七尺。寬二尺。明嘉靖時立。文係邑人陳昌言撰。

後樂亭碑

原在舊縣署。後遷置城隍廟。文係知州劉廷禔撰。詳藝文志。大明萬曆四十八年。歲次庚申。季夏。吉旦。典史葉元申立。

重修觀音寺碑

在大林店東觀音寺。山門外。高七尺。寬二尺。許。題施主祝姓。地主孫姓。文字多不易辨。大明隆慶四年立。

小亮寺碑

高八尺。明成化二年立。

泰山廟碑

在輪凍西北隅廟內。明嘉靖四十二年癸亥爲史筆法創修。此廟立。

白水橋碑

在鐵佛寺西。明天啓二年立。紀修橋事。

清

亦樂園碣

在縣政府東法廳院東便門外墜上。國係清成豐時知縣廖慶謀創設。汝寧府知府周爾墉撰文。題名亦樂園。

何公紀念碑

在西巖店何岡。為明別駕何麟立。原生李春耀撰文。吳彬論序贊。

創修試院碑

同治八年。為知縣張寶禧創修。試院立。舉人黎鴻猷撰文。

獨租碑

在固城寺山門內。甬路東。上書南陽糧捕府陳公署真。陽縣事獨租遺愛碑。下書康熙十九年庚申冬月立。

重修古龍池碑二

一在龍池院門東山墻內。題一清康熙五十一年立。

善一在龍池西園溝外。清道光二十八年。知縣鄭元新祈雨靈應。澗池重修。鐫石記之。文詳藝文志。

重修古龍池碣二

一在龍神祠東山墻。清道光三十年。知縣鈕雷因大旱祈禱得雨。咏詩勸碣志慶。詩詳藝文志。字法婉勁。脫灑。

一在龍神祠東間後壁。清光緒十四年。大旱。知縣何桐青。澗池度歲。雨隨時降。題碣以詩。文曰：龍池留古蹟。靈境幾氾滅。廢置榛莽中。多年無人識。豈知有神龍。祈雨感應捷。時適逢大旱。步禱虔心切。爰為疏澗之。泉為噴數尺。非惟泉生井。且占月離畢。甘霖得立霑。三農盡

歡悅。於焉繚以垣。於焉登以石。古蹟使復興。靈境復重出。藉之答神庥。庶俾永弗失。

重修黃公祠墓碑

清道光二十八年。知縣鄭元善重修。立碑祠院門左。民國四年。袁紳改建新祠。舊祠全廢。碑亦損壞。文詳藝文。

黃公祠墓碣

清季邑典史黃煜、修理祠墓。撰題碣石四段。依次嵌置祠內壁上。文字均極工整。修澤。民國四年。祠宇改建。是碣遂移嵌新祠東壁。今新祠廢墜。有年矣。所有關於邑之文化事物。能否維持保存。深有望於邑之主持風教者。

瓔珞松碣

在十方院大樓門左壁上。院有瓔珞松一株。清道光庚戌年。知縣鈕雷。賞其風韻秀茂。題詩一首。文字雙佳。院僧鑄之于石。

重修崇聖寺碑

在汝南埠西。羅山拔貢吳廷獻撰文。記周重、溫如聰、咸被澤、張四海等。捐貲重修事迹。

革除陋規碑

在縣政府大禮堂前。民國十六年一月二十三日。縣長桐城吳政立。文曰：爲革除陋規事。正陽頌歲以來。迭經浩劫。流亡載道。十室九空。本縣長三仕爲令尹。所在輒多興革。此次承乏是邦。值凋敝之餘。軫念民生。尤爲悲感。撫循化育。責在藐躬。葆固天和。尤係職守。查本署審理案件。向有具結費。十千或五千。和解費。卽銷案費。十千。至六十千文以上。訴訟報到費。五百。至十千文。又有地保點卯費。四百文。地保更換費。四千四百文。或三千三百文。代書更換費。二千二百文。其他陋規。不勝詳載。是以臨民聽政之官吏。轉爲魚肉人類之虎狼。稅政惡習。聞之痛心。自此佈告以後。永遠革除。如再發現此項。或其他類似名目。仍事需索者。准人民來縣告訴。亦可向省署。或高審檢廳告訴。依法嚴辦。革千百年相沿之痛苦。解數萬姓東縛於倒懸。此爲培養劫後餘生元氣起見。留正陽百年後子孫吃飯地步。當亦我闕境父老所樂聞也。除呈司法部。省長。高等審檢廳。備案並佈告外。特此勒石。以垂永遠。

按正陽金石之較爲可記者。實不止右列各件。因此次採訪。阨於時勢種種之障礙。

不能盡量摩挲。廣闡古人之陳迹。故僅就顯而易知。文獻確鑿者。聊爲存之。以備一

格。其他如大成殿之宣德爐。

高度。口徑。均二尺許。邑人熊文。則由蒙古運獻。今被轉移。

十方院左之黃叔度故里

碑。

今已移轉別處。

慎子將軍墓之斷碑。

折爲二段。字跡剝蝕已盡。

修理試院書院碑。

原在書院門內。黎鴻猷撰文。改學校後。移

于外。重修文昌宮碑。

原在文昌宮院。張井撰文。辦學校。折毀此宮。碑亦仆。

是數者。均有記載價值。次如銅鐘王碧

霄書碑。

在玉皇閣。

祖師廟石刻龍牌。

廟在涂店北。牌由廟左龍埂中掘出。係明代故物。

一則書法婉勁飛舞。一則

雕工精緻異常。亦好古人士所樂爲撫摩而愛護之也。況邑境遙遙百里中。若慎。若

沈。若江。若安城。若臨淮。爲古國者六。若白狗。若建安。若慎陽。安陽。新陽。保城。爲古縣

者亦六。其間故宮廢殿。古臺荒刹。所遺墜之金玉箴銘。暨紀念之鐘鼎碑碣。沉沒於

頽墟宿莽。俾名流勝蹟。歷千百年而不蒙鑒賞者。不知幾許。清乾隆時。安城耕農得

古鏡二。光緒末。臨淮人掘土得玉璧二。民國初。有鋤得古錢數千者。有挖塘得爐壺

盂勺多件者。識者多辨爲漢器。乃皆以廉價拋售。而不知珍護。惜哉。邑寓公。沈君啟

堂。雅好古芳。收藏亦無多名品。前縣長劉。曾移城關石佛於縣府。以彰古石工技術

重修正陽縣志
之精。雖有因舊啟新之美意。而不謀具體保存。終屬無補。茲志本擬取可傳之吉金。貞珉。製成拓照各片。裝訂冊內。以昭真像。詎遘斯時艱。有志未逮。莘莘後賢。有起而補缺正謬。完成此未竟之功乎。無任企予望之矣。

重修正陽縣志卷八

重修正陽縣志卷末

總纂 光山

堯初 陳全三

編纂 邑人

益三 潘守謙
漁村 呂兆璜
少章 吳彬詒
子翔 鄆鵬雲
屏亞 蕭廷藩

校正 邑人

紹宣 趙憲章

雜綴

叙曰。正陽舊志。體例欲求精嚴。而稍嫌太簡。時楊大令德容。商同邑進士。賀祥。葉儒林。選貢張拔。諸君。續爲補遺二卷。所列故實。有關於民生風化者。頗多。茲屆重修。業經摘要。列入各門者。有本可採取。而未及詳錄者。爰爲斟酌搜集。並例無所屬之軼事異聞。一同記載。且追述舊志源流。用昭前徽焉。爲雜綴。

風俗總論 舊志補遺

邑當明嘉隆之際。科名續起。風流文采。輝映一時。仕宦俱有聲。其卓卓者。與時所謂七

子輩相唱和多推爲弗如。今士大夫尙能由舊而不好標榜。不慕榮利。有黃叔度戴伯鸞之遺風焉。

邑人重去其鄉。離家百里。輒有難色。故商賈少而農業多。若無田者。赴逐僱傭。計歲而受值。曰長工。計時而受值。曰短工。又有種他人之田。而計畝均分者。曰佃戶。少隙。則又計日受值。爲人傭作。曰幫忙。操土木匠作者。謂之黑白生活。凡農家。業極勤苦。及歲告成。公稅私租。償貸之外。其場遽空者。什八九。然帖帖自甘。不知怨尤。歐陽修所云。民生不知外事。而安於畎畝衣食也。

邑之北偏多麥禾。與汝蔡同。南偏多稻。與光羅同。旱澇俱有所入。牛一犍。見買國齊民要術約種田百畝。業不精。而收薄。惟近淮汝者。地稍肥。餘平衍而瘠。水經注所稱諸陂。皆在縣境。年豐則飲酒擊豚。或至貪天。一遇荒歉。十室九空矣。蓋吾邑數頃之田。值不及千金。較他邑。爲貧苦焉。

按漢書地理志、蔡州穀有五種。今稻菽之類、種名較繁。邑之南、塘堰連界。水車秧馬、恃以爲生。稻之名品、不讓吳楚矣。

地理志又言、畜宜六擾。今羊豕鷄鵝之類、土人常畜之、以規微利。

邑水族之利、亦民所資。村鎮溝塘、買魚苗養之。濱淮汝者、多業漁。取魚之具亦備。結繩

持網者、總謂之網。其他曰鈎、曰罾、曰單、曰旋網。俗呼撒網曰斷。或術以招之、或藥而盡之。夏

秋之交、魚或大至、順流而下。各以類分、舉網即得。值亦大賤。故北人稱爲魚米之鄉云。

邑中苾菜、一名白菜。又名黃芽。爲入饌名品。秋冬以後、園圃彌望皆滿。信羅、光、黃、取給焉。淮以南、種之而不茂。蓋地氣使然也。

薺菜、邑中所在有之。用作羹味甘。十月後、婦女結伴、挈筐提籃採之。資以禦冬焉。

邑中種棉織布。大概有之。惟陡溝店獨盛。家家設機。男女操作。其業較精。商賈至者、每挾數千金。味爽、則市上張燈設燭。駢肩累迹。負載而來。所謂布市也。東達潁毫。西達山陝。衣被頗廣焉。居人號曰陡布。

織綾之業。以寒凍為最。值亦較昂。號曰寒綾。

半夏。劉志載為真產。今田間所在有之。

邑北瀕汝有汪湖。大數頃。淮墻有鴛鴦湖。蓮花池。多產蓮藕菱芡之屬。秋間採之。以易錢米。亦小民生計所資。蓮有紅白二種。菱分家菱野菱。酉陽雜俎言四角三角。曰菱。兩角曰菱。今邑中所產多三角。而皆稱菱角。蓋土俗相沿之名。芡一名鷄頭。紫梗蒲包。粒肉如榛。

附載劉志開墾法 舊志補遺

利犁制。不用全犁。止用犁轅。前橫木繫繩索。後置利刀。以鐵為之。長一尺。柄長三寸。博八分。背厚四分。微曲至末。刃向前。刀入土。前利後犁。草根既斷。墾塗亦易起。稜礮制。用粗紅石細長者。鑿成稜。欲深而有鋒。如常制。荒田中帶水碾之。草堰泥起。頓成熟田。夏日用之。利殺草。加熱湯尤佳。

書真陽縣沿革志後 清順治時劉志

田育性

真陽遠不可稽。由北齊至今。爲沿爲革。固昭然在人耳目間。神武文宣。守境不暇。能無革乎。至隋文。土宇之擴。三代未嘗有。乃下議曰。官煩民敝。革之。然猶有愛惜之意焉。歷元至正。妖人劉福通。據朱臬。犯光息。破確山。交蹂斯土。雖欲縣而有所不能也。至明宏治。百餘年德澤。然後生計漸繁。雖不縣而不可得也。其地平原廣野。既無山產。又少水畜。穀蔬不堪遠行。水陸不能通商。養生惟恃五穀。所以生息而噢咻之者。必有道也。職斯土者。幸深長計之。

書塘堰志後 清順治時劉志

田育性

真陽高無仰止之山。低無百尺之水。旬日雨。則無麥。旬日不雨。則無稻。雨暘時若。南畝之婦子。盡展其力。麥之斂。不及汝北之半。稻之入。不及淮南之半。汝南志云。地瘠民貧。故土廣賦輕。識真陽之地利者。惟漢郡守鄧晨一人耳。因勢利導。復古塘四百餘口。澇足以殺水之勢。不傷禾於地。旱可以導塘之水。而救穀於田。故舊志云。五穀接種。高下兼施也。又溝洫之會。復鼓民間之樂善者。爲橋十六。行者歌於途。農夫歌於野。誠千載

一時也。明初尚存三十八塘。淤久不能積水。當時以爲無益。官乃下令開墾之。小納以愚上。萬曆間。西林黨復取其租。以媚鄭貴妃。爲胭脂地。而塘堰永不可復矣。嗚乎。豈異人任也。

集詩小引

舊志補遺

志之有詩。與選詩異。不專取其詞之工也。有關於一縣之舊蹟者。錄之。或其人本能詩。而集已不傳者。錄之。至田賀兩君詩。自所存數篇外。尚有羣兒嬉戲。廢寺鐘鳴。度材伐木。客歸展墓。四章。雖古無此體。而民當離散之餘。生氣漸復。兩君歌詩以紀其實。錄之以當婦諺童謠。未始不可備觀風者之採擇也。

詩錄本文

書地里補遺後

舊志補遺

按舊志。據康熙志于地里之可述而識者。往往闕如。今掇拾舊聞。較前加詳。而一徵于古。附以碑碣坊表。俾考古者。得所依據。且使邑之人。知爲舊物。而愛護之也。若夫不逢好古之士。而沉埋于荒榛墟莽中。不知其幾矣。

此項所補。均錄本志地理。

書人物補遺後 舊志補遺

按舊志指康熙安拆志未明安成之所屬。又不載安陽城。故置其人于弗錄。非略也。今舉安成、

安陽人物列女之見于史冊者。綜其生平出處行事。著于篇。俾有志者。知此邦故多名賢。庶觀感興起。而因以自勵也。至近日有克自表見者。亦附入焉。此項所補均錄本志人物。

異聞 舊志補遺

縣東北四十里。有古墓。土人呼爲扁鵲墓。史記扁鵲列傳。秦越所適之國不一。未言至汝南也。墓西有橋。爲扁

鵲橋。康熙中。大雨陷焉。露石槲。巉巖然。槲旁有立石二。又一石橫於顛。疑卽古豐碑也。

水實其中。病者飲之。立愈。遂相傳扁鵲爲神醫。其水可療病。遠近多挾盜伍而來汲者。

雍正中。邑民余乙。以好博蕩其產。有老母。凍餒不恤也。母初戒之。輒怒目相加。繼出惡

聲。母不復言。夏日晨起。謂母曰。好看門戶。我到村東乘涼去。遽出。母倚門獨立。俄見黑

雲轟起。風雨交作。雷聲沈沈。繞屋角。母祝曰。雷神欲擊吾不孝子耶。時乙方在村東瓜

架下。與里中數無賴子。共博。驟聞霹靂一聲。雨遂霽。村之人。遙見火光閃爍。驚往集觀。

乙已焦頭爛額而死。數無賴子。俱僵臥于瓜田中。濡首于泥者數寸。昇歸之。半夜方甦。民某。寒凍店人。事母孝。結廬汝水之涯。家無四鄰。乾隆四十七年。秋七月。汝水漲溢。某夜起視。室中已水深尺許。大驚。不暇顧妻子。被裹其母。負之出。至村外高處。置大樹之顛。度可無虞。始歸。則廬盡傾圮。念妻子已無復生理。幸母猶存。殊無所苦。旋至樹下。候天曉。水稍殺。負其母。赴近村乞食。食母。邀素相識者數人。荷畚鍤。往視其廬。水遇四圍。掘之中。乃乾土。無少浸漬。屋梁橫據。瓠甌上。妻子踣其下。竟不死。衆神之。遂奉其母。移居別村。室家得完好焉。

徐乙。父早沒。貧不能娶。與其母暨妹。僦居富者之室。乙方獨臥。頓覺風習習。寒氣襲人。矇矓中。見一女子。解衣登榻。乙遂沈沈睡去。後無夕不至。漸就羸瘠。心懼焉。白諸母。母爲延巫。百方驅除。卒無驗。一夕風聲作。祟又至。乙以手摩挲之力。扼其項。厲聲一呼。卽昏不知人。母與妹。共秉燭往視。一巨蛇。縛乙身數匝。乙手持之。堅不可開。蛇死。而人亦僵。急取庖刀。碎斷蛇。而解脫之。達旦始蘇。祟遂絕。

一民家患狐擾。嘗數人坐室中。仰見椽間火起。燄高數尺。急覓水。緣梯上。則火已熄。燒痕纔如錢大。買葛布數丈。越夕取視。卷軸如故。而中幅已翦空。別室積薪其中。戶常扃閉。忽烟如雲擁。自窗中騰出。啟戶視之。固無恙。如此類者甚多。家人不復能堪。後郡人有爲江西某縣令者。寄與天師符一紙。貼壁間。狐不復至。

王媪。汝南埠人。年六十餘。子業灌園。乾隆五十年夏月。媪遘癘疾。遂不起。殮七日。俗謂之一七。其子爲作佛事。忽聞棺中呻吟。驚呼家人。啟視之。媪已復活。瞪目呼曰。將水來。熱殺我矣。扶出。飲以水。病尋愈。後壽至七十餘。詰之。則秘不言。若冥冥中有戒之者。第云去而復歸耳。

清光緒十二年。邑庠生胡公靜齋。主教鄉塾。課餘。與弟子談因果故事。稱母舅鮑翁。范庄店北老農也。畜一牛。馴而多力。某年秋末。藝麥既終。翁一人夜宿牛房。事餵養。夜半。夢幾醒。忽聞言曰。我欠你八串錢。給你耕了八年田。南村欠一斤紙錢。翁甚驚異。急起。燃燈遍照。門扃如故。渺無人跡。遂添牛草。吸煙小坐。旋復就寢。甫入寐。又聞言聲。仍爲

我欠你八串錢。給你耕了八年田。南村欠一斤紙錢。共三語。翁驚醒駭極。再靜聽。無所得。心忤忤。不復成眠。更將殘矣。復聞前語。甚確。聲恍自牛槽頭達來。疑愕不安。披衣悶坐。東方甫白。有南村回民某。翁契友也。前來借牛種麥。慨然許之。是晚。回某播種訖。牛即倒斃田畔。翁得息。迴計購牛。恰滿八年。遂慰友。弗擬償。並令子。穴地葬牛。不許價售皮肉焉。

銅鐘鎮西大佛寺。舊有呂祖像。靈應素著。鎮儒士雷某。嗜清修。家設乩壇。焚香攀仙。每有禱請。呂祖輒降乩。談休咎。靡弗應。咸同時。捻氛肆擾。屢擬移呂祖像於寨內。未得邀准。一夕。乩令速移。並指定街東某園。爲新廟基址。鎮人倉皇移像。有所損。是夜。捻果大至。攻寨不克。縱火大佛寺而去。嗣建呂祖新廟。重塑法像。面竟西顧。屢經改塑。扶正。終不能變。今猶迴首西向。豈神亦殷殷戀舊耶。抑別有義蘊耶。蓋不可測矣。

涂家店南首炎帝廟。左側爲大仙祠。清道光以來。嘗有飛鸞顯化之遊仙。棲靈於此。憑乩度人。某年院試前。曾扶乩。問進學人數。乩書一燕落寒宮。五字。莫得其解。後有考名。

涂燕存者。試場坐寒字號。考取入學。其預言。每如此應驗。一方人士。多邀之。問病決疑。又有已故生員。危雲錦。降示姓名。友人涂允中。適在座。詰之曰。君葬時祭文。係余所作。能記憶否。乩振振疾書原祭文一段。允中跪而拜曰。是矣。遂互道故舊。恍若平生。詩曰。神之格思。不可度思。顧不信歟。

邑諸生呂某。

諱其

舉業頗優。有折桂望。少時。曾因怒。杖斃僕女。道光某科。治裝赴秋闈。

行踰汝郡矣。途中。忽有呼於後曰。大爺。那裏去。我將隨之。一回顧。則所杖斃僕女也。瞬不見。於是低徊沈思。以爲疑心生鬼。復前行。不及十里。又如是呼者。再且再見。僕女形。遂惘然投宿逆旅。詰朝。南行返里。懺悔省心。終身不復應鄉試。

邑東南八十里葉家廟。多靈蹟。鄰近監生某。有才幹。每藉廟工暗斂財。人鮮知者。晚年患異病。若瘋若狂。日督促子婦治盛饌。招親故。暢恣宴飲。客稍謙讓。則曰。勿爲我惜財。是皆就廟工取得者。或勸止弗言。又歷述某某工吞若干。以證實。酒筵或略儉。卽責罵子婦。不少貸。如是揮霍者。數月。貲將告匱。始疲憊而卒。又有廟屬某不孝婦。忤逆翁姑。

潑悍異常。親族恨之。無如何。其死也。是廟。每夜拷掠鬼號聲。震驚四鄰。時有醇謹書生。夜讀于廟。迭現幻形驚擾。書生迂讀。不知避。俄而燈火猛熄。書生竟昏倒院樹下。僧衆舁送歸。歷時方蘇。追述所見情形。共驚爲神威赫濯云。書生姓黃。後爲忠厚長者。嘗舉是事。警告鄉人。

邑西南黃選貢。負鄉望。一言九鼎。孀婦某。節守有年。後被人勸誘改適。意不自主。質於黃。黃謂節孝固好。再醮古已有之。國例不禁。可自酌之。婦於是嫁。黃後夜行。遇鬼。詰之曰。汝非黃先生耶。婦爲我守節行孝。我待之多年。因汝一言而去。何缺德乎。黃悚然不知所答。鬼又曰。念汝好人。不相難也。遂不見。黃慚惶急歸。常述誠同人。須慎言。

邑南彭孝子。愛敬雙親。天性自然。終身不少變。父母先後歿。均廬墓讀禮。朝夕眷戀侍奉。一如生存。中經驟雨烈風。屋折木拔。人盡惶恐。惟孝子仍寂守墓廬。安然如故。至孝格天。與孟宗冬笋前後一轍。且同係邑人。而孝子又名宗孟。或謂此中妙有淵源。亦或然也。陳州劉樂溼。曾贈以詩。邑紳葉儒林。張拔等。均有題識。清乾隆年間。曾數舉優行。

正陽縣舊志序一

爲政之道在乎善因。非僅規隨執一之謂也。因時地而損益之。折其中。以由其舊。乃臻善治。惟志亦然。修之者。述而不作。徵後來之文獻。守既往之典型。纂言有要。與出治同符。正陽由漢置慎陽縣始。其地襟淮帶汝。蔚然奧區。雖幅員不甚廣。而風土實爲汝郡冠。縣之有志。肇自前明。迨國朝康熙丙子。復修以來。至於今百有餘歲。允宜採輯編排。以續前軌。乾隆六十年春。滇南楊令德容來接彭令良弼之篆。適奉檄飭修縣志。爰徵才設局。攀彭令以總其事。彭令江右世家。學有淵源。而才識尤卓犖。無愧三長。且在任十六年。治具畢張。茲因內艱讀禮。既舊政必告矣。復博採殫精。與楊令參訂。犁然成帙。夫志之爲體。與史相表裏。文詞字句。抑末也。惟體例之精審。辨哲爲難。斯帙踵前志。而加以損益。或分或合。或存或刪。若網在綱。有條不紊。因乎前人。而補救衷於至當。非泱泱之沿襲。而倒戈者比。從政者。考鏡於斯。執簡御繁。不愆不忘。文也。而治於是乎在。嘗見明王文恪公鑿記黃叔度所著之天祿閣外史八卷。謂其議論醇雅。氣象明裕。質而

盡美。婉而成章。得國語左氏之體。而無其豔。擬子長孟堅之雄。而無其陋。乃立言之善。於因山川風俗人物事類。則壞定賦。前後異同。損益詳略。悉汰其附會影飭之詞。而一衷諸實。至其體裁義例。較原本特嚴。而簡潔過之。四難三長。舍兩蒼其誰屬哉。夫文人之才。立言者未必立功。今兩蒼西邨。能交出緒餘。樹不朽偉業。豈非一時之嘉會。而千古之大觀也哉。間嘗讀禹貢。而知厥土厥賦之上下。讀周官。而知山川藪澤之高廣。讀風詩。而知士女之貞淫。鳥獸草木之變態。易著城郭封建井邑。禮有王制六義。春秋書城虎牢。作南門。周禮載職方馮相諸官。則此志未嘗不合於經也。讀左氏司馬氏班氏范氏歐陽氏諸史。而知立事行政之得失。嘉言懿行之昭垂。則此志未嘗不合於史也。遠合於經史之遺意。近則與通志相表裏。譬之雲霞麗天。而文繡亦煥其彩。江河行地。而溝洫亦潤其流。雲霞江河自成其大。文繡溝洫自成其小。天地之間。正以小大並存。而益彰其盛。將見後之守土者。按籍而稽。其於裁一邑之事。研一邑之幾。而當且晰也。何有。雖與宰天下可也。則是志之成。洵彭楊二宰之大有造於正陽也。豈惟予實嘉賴。

之。爰喜而書諸簡端。以塞西邨之請云。時嘉慶元年。歲次丙辰。嘉平之吉。知汝寧府事。長白德昌敬題。

正陽縣舊志序二

士君子出膺民社。非瞭然於當世之務。與上下千百年之久。而欲裁一邑之事。靡不當。研一邑之幾。無不晰。證乎前。而不爲傳聞所惑。垂乎世。而不爲當世所譏。其勢不能。則志乘尙矣。漢初入關。蕭鄼侯獨收秦丞相府圖籍。佐高祖成帝業。朱文公守南康。甫下車。卽問郡志。論者謂其識爲政體。二者其明驗也。顧志乘一書。作者難。述者亦不易。何則。後世從政者。大抵厭久任。而利速化。瓜期一及。鳧鳥旋飛。繼至者亦往往傳舍視之。聽其散然。而弗加叅訂。洎乎文殘獻謝。考鏡無資。求之而不得。雖鄭重而愛惜之。抑晚矣。予今觀彭楊二宰之重修正志。而不禁深有會也。稽正陽縣志。修自康熙丙子。屆今百禩。我國家深仁厚澤。久道化成。設今不修。後將奚鑒。乾隆乙卯春。予方纂修郡志。適晉寧西邨楊公。奉命視正篆。亦以重修邑乘爲己任。予竊喜引爲同心。而更喜前令兩

蒼彭公之雅共斯志也。蓋兩蒼以南昌世家。擅騷雅之宗。備華實之理。尹正陽十六載。生聚教訓。善政彰彰在人耳目。固知其得於中者深矣。夫何以內艱解綬。養疾寓齋。西邨每過。問舊政。輒以邑志叩。兩蒼遂樂許其成。與搢紳耆彥。昕夕參稽。閱半年而筆削始竣。舉凡正邑之賢者。正陽人士所俎豆不祧者也。斯志殆無越先民之矩矱乎。方今聖聖相承。重熙累洽。咸五登三。凡百有位。遵守範圍。過者俯而就。不及者仰而企。因地制宜。隨時損益。於萬斯年。治譜所續。將不勝其相因勿替矣。琛忝察是邦。樂觀斯志之成。而颺言及之。用勗民社。弁諸簡端。嘉慶元年歲次丙辰孟秋月中浣。誥授中憲大夫。分巡南汝光道。前署河南按察使。桂林陳鍾琛撰。

正陽縣舊志序二

邑志與國史相表裏。周制左史記言。右史記動。漢法太史氏位丞相上。典至鉅。故故任之也。至隆。下迨方國州邑。無不祖是意。上以備輜軒之採。而下以博資掌故。考古証今。非徒供省覽而已。正陽置縣始於漢。由魏晉以迄宋元。因革不一。明初省入汝陽。宏治

年間復置。今三百餘年。井疆賦稅。水利營田。以及風土。人文。山川。道里。今昔各殊。不有簡冊記載。蒞治者。將何所取鑒。乾隆乙卯。予奉簡命。承乏斯邑。下車之始。披覽志乘。篇頁就缺。魚魯沿譌。蓋自康熙丙子。前宰西河安君。重輯後。百年來。因仍其舊。前令南昌彭君。武進徐君。均有志未逮。予曷可以再譌。會太守長白德公。方設局纂修府志。檄令訪求下邑文獻。并飭重纂邑志。甚盛舉也。時彭君以內艱得替。暫留養疴。因攀令總其成事。邑學博新安呂君。宏通博雅。嫻於史裁。亦樂成斯舉。遂於三月間。開館。賴邑之紳士。協力襄贊。網羅前聞。搜訪遺逸。予自愧鞅掌簿書。於載筆無能爲役。得從諸君子後。釐定舊志。商確編纂。綱舉目張。頗無放失。凡六閱月。告成。時賀葉二君。自都旋里。相與商酌而增益之。爲補遺二卷。以綴於後。百餘年之缺略。得藉手以竟其事。其欣幸爲何如耶。書成。因叙其緣始。以及起訖時月。弁於簡端。嘉慶元年。歲次丙辰。仲春月。正陽縣知縣晉寧楊德容謹撰。

正陽縣舊志書後

正陽縣志之宜修也。不自今日始矣。晉寧楊公。以乙卯二月。來宰斯邑。會郡憲重修府志。檄令採訪前志。康熙三十五年後之各事。具呈。以備核載。時弼已得代。暫留養病。楊公以併請重修縣志。就商苦次。噫。嘻。此弼有志未逮之事。聞楊公言。竊幸文獻之絕而復續。而楊公之能彌其闕失也。力贊成之。遂條具事宜。申請道憲府憲。皆報可。於是百餘年之職官。選舉。孝義。節烈。宦績。文章。又燦然布在方策。至於因革損益。今昔校殊。則詳加釐訂。事備而文不煩。豈惟官斯土者。喜得拾遺補闕。亦邑人士所樂爲考究者也。弼報政既拙。尤抱殘守缺之是愧。輒承憲意。謂弼久任是邦。命與叅稽。蓋弼自乾隆戊戌視事。迄甲寅受代。歲月十有六易。凡鄉堡村市。靡不因公周歷。間與邑之縉紳先生。及諸父老。相接。詢邑中往事。其間衣冠文物。風俗利弊。莫不入於耳而識於心。斯時有舛錯者。弼能從旁証之。有失實者。弼能從旁指之。楊公每以弼言。質之邑人士。信而有徵。故多聽納。弼之贊襄斯舉。以仰答上憲委任之意者。惟此而已。若夫志之大略。具載凡例。筆削之事。楊公任之。學博呂公。相與商酌裁定。弼初無涓埃之效也。時嘉慶元年。

九月下濬前正陽縣知縣彭良弼謹書。

正陽縣舊志補遺序

前志、南昌彭公已編纂成書矣。於風俗、物產、典禮、災祥、蠲賑、不錄焉。晉寧楊明府進邑之紳士而語之曰。前志體例精嚴。允稱善本。但閱舊志所載五者頗詳。吾不欲沒焉。他如詩文遺事亦尙有可採者。商爲補遺一冊。屬邑進士葉君。選貢張君。文學葉君。及余爲之編次。余愧不能文。累辭而不得所請。因念順治十八年舊志。余伯高祖韜章府君曾襄其事。今且百餘年。而余又得與是役。不可謂非幸事。乃從三君子之後。爲之校讐。書成。進之明府。明府曰善。請梓焉。爰綴數言於簡端。時乾隆六十年冬十二月。邑人綏亭賀祥序。

康熙丙子志舊序

先王分茅胙土。邦國既制。卽有史以編年紀事。誠鉅典也。今之郡縣等古侯伯國。昔之史猶今之志。志首封建。次則制度因革。與夫山川形勝。風俗人才。以及名物象數之繁。

靡不畢萃。致治者興廢舉墜。大端莫踰此焉。歲庚午，圻恭膺簡命。作宰慎陽。齋宿三日。後周視城垣。則縱橫瓦礫。巡行阡陌。則漫沒蓬蒿。士半鶉衣。民多菜色。凋殘至此。責更誰歸。會紳士有因公來謁者。詢以爲政急務。僉曰：慎陽僻壤也。兵燹屢經。鮮子遺矣。圖治規模。載在典籍。可考而知也。乃索觀舊志。庶冀啟予。肇作者徐君覓。成於嘉靖乙卯。繼修者劉君必壽。成於順治庚子。距今三十年矣。時移事異。闕略孔多。思及時搜輯。另編。方倦倦焉。有志未逮。會大中丞閣公檄令郡邑。修輯志乘。圻欣逢盛舉。獲竟初衷。爰偕兩學博張君明經、晏君允恭、劉君夢蘭。遠稽近考。博採旁搜。前之虛誕者。實之。後之遺漏者。增之。刪繁就簡。徵信缺疑。甫踰月。而卷帙告成。其間綱目俱舉。巨細畢登。考獻徵文。瞭如指掌。非徒以備省覽也。政治之得失。民風士習之淳澆。與夫賦稅生齒之盈絀。胥於是乎考鏡焉。則是編也。詎非爲政之急務。而不容或緩者歟。雖然。慎至今日。蓋難堪矣。求所以拊循而安輯之者。司牧之事也。若夫假以便宜。寬以歲月。俾下吏殫心民瘼。不能無厚望於臺省大人焉。康熙丙子仲冬月。真陽縣知縣西河安圻撰。

順治庚子志舊序

知縣 劉必壽

上古之書有三墳五典八索九邱。邱聚也。言九州所有土地所生風氣所宜聚此書也。古人以是爲學。故能道訓典以叙百物。獻善敗於人主。今之圖志蓋九邱之遺也。吳楚柏舉之役。蒙穀負鷄次之典。以浮於江。楚國既定。蒙穀獻典。五官得法。百姓大治。此則經散亂之後。典章復存者。是以昔人美而誦之。君子之致治也。四海九州之大。不易民而理。三戶十室之聚。不違俗而觀。化於冥昧之中。而成於揣摩之際。必也。左右辟違。先後乘除。豈如典籍具在。方策畢陳。燦然備者。臚若貫珠。毅然當者。審如中鵠。彼武城單父。所以政治平而民悅。教化行而俗美。未必不有取於斯也。

志成於嘉靖

三年前此之事。略而未詳。後此之事。軼而罔稽。我朝順治十有六年。開府賈公

邑之志尤屬

承乏真土適逢

撥拾舊聞。收羅殘編。哀集而附益之。其秉筆者。貢生田子育性。庠生賀子斐。鍾子揚。張子國香。劉子宗漢。越二月而志成。展卷而覆觀之。觀乎躔次。而裨祥具焉。觀乎疆

域而險易具焉。觀乎物產而豐儉具焉。觀乎戶口而登耗具焉。觀乎田賦而輕重具焉。觀乎前政而寬猛具焉。觀乎人物而典型具焉。綱舉目張。纖細靡遺。懸戶牖之箴銘。昭盤孟之勸戒。紹往事之芳徽。作後來之藝譜。爲是編者。豈徒以資考據。備紀載而已哉。夫宣上恩德以布于下者。有司之事也。采下風俗以貢于上者。亦有司之事也。壽也。敢不勉旃。

明眞陽縣志舊跋

黃 鎮

國家有一統志。以博採天下輿圖之廣。川谷風氣之異。斑斑乎詳且備矣。若無庸於縣志者。顧彼之所載。惟大綱巨要。而纖微瑣細之實。見諸幽遐。而徑行於一域者。則固簡冊之所未書。而紀錄之所不及。是故縣志不可以無作也。眞陽舊有志。而疎略俚劣。與無志同。靜泉徐明府。甫下車。興廢舉墜。百務維新。慨然曰。政有大於志者乎。卽延松巖何君。俾纂修之。未逾歲。而篇帙秩然備焉。其文質其事核。其考據精詳而不謬。視前志大有徑庭矣。嗚乎。微靜泉明府之賢明。莫能識時務之大。微松巖何君之博雅。莫能成

靜泉之大。茲志允足以悉前書之未備。而傳諸後矣。鎮捧誦之。不能已於言。

闕文補遺

史乘價值。貴在信而有徵。孔子於夏禮殷禮。祇以杞宋無徵。能言而終不敢言。且信則書。疑則闕。乃史乘之定例。縣志亦何獨不然。正陽新志業編印成書矣。酒餘燈下。時同陳公海瀾長者。閒數故舊。各述見聞。其中事蹟。多有可傳。而限於採訪未及。遺未編入。將爲補錄。竊嫌知之不盡不詳。將任其竟遺。此心終耿耿不能自釋。輾轉思維。謹援先聖闕文之義。據所能知。述其概略。疑者闕之。以待將來。黃山舖張公。廩生張府成父也。性寬厚仁慈。居傍通衢。行旅空乏。必資濟之。路人類能言。銅鐘王虞臣君嘗稱之。今忘其名。一邑東闕名醫劉菁華。有診必效。爲同光時一邑救星。數十里外重症多延之。一潘店李少山有子媳數房。純孝競優。可以風世。家道日興。一銅鐘鄒和泰之賢婦某氏。德行善良。內外欽崇。一板橋店廩生龔大觀。萬安店貢生卓裕堂兄弟多人。土扶橋增生鄒雲程。皮店貢生張氏。拔按持摺兄弟。及魏大經。徐學之。涂店廩生涂天一。及子增

生正中。姪廩生煜。呂氏兄弟三廩生。是皆清嘉道後名下士。或優行誼。或精學術。或嫻教授。父老流傳。祇沿述梗概。而不詳其全。一節孝。則有潘店李芳立妻陳氏。生女二。夫早亡。青年苦節。白首完貞。朱店盧陞妻陳氏。年逾二十。夫遭冤害。無子。立嗣節守以終。徐店潘張氏。早喪所天。節撫孤子。潘銀培。成立興家。孫曾衆多。是皆懿行之不容終湮者。且沿淮一帶。胡方。徐。曾。江。各姓。清光緒來。曾有杜絕亂源。大義滅親事。均能懲一警百。得保地方安寧。近年風氣。反其所爲。幾演成惡化。不可收拾。是亦得失之炯鑒。世道人心之不可忽視者也。綜稽各項。或列名而事實不詳。或事舉而名不能記。雖強附夏五郭公之例。實亦茲志遺憾也。論語以不知不慍始。以不知言無以知人終。尙書以秦誓知人不明悔過終。周易六十四卦。終於未濟。是均含有闕意。茲志不敢妄擬。亦聊做斯意云爾。修志同人公識。

重修正陽縣志卷末

終